

# *MOSEBETSI O*

## *TSOILENG-MATSOHO*

### *O A MOLIMO O A SUPTJOA*

 Ke u leboha, haholo, moena. Billy o batla ke tlalehe lena e le khetlo la ka la pele sefaleng, likhoeling tse tharō. 'Me o... Ke hopola khetlo la pele ha ke mo nyolla, ho paka, o itse, "Ntho ea pele, ke tšohile." Le 'na, ke joalo. Ekaba lilemo tse mashome a mararō le metso e mehlano bosebeletsing, ena ke nako e telele ho fetisa ke tlohile sefaleng ho tloha ke kene bosebeletsing bona. Ke ne ke hloka phomolo, ka hona 'na le Moena Mosley, le baena ba bang mona, re tsoa letšolong la ho tsoma. 'Me joale re batla re phomotse. 'Me ke kōpano ea ka ea pele haesale ke...ho qala ka la pele Loetse. 'Me ke ntho e itseng. Bosebeletsi ke ntho eo u batlang u tlameha ho e tiisetsa.

<sup>2</sup> 'Me joale ke ba kōpile ho tima fene eo, kapa ho bona haeba ba kae tima, hobane ke tseba ho le boima ho utloa. 'Me ho boima, ke a tseba, ha motho a paka. Ke ne ke thatafalloa ho ba utloa. Na le utloa hantle joale? Ke botle. Ke tseba ke tlameha ho ema haufi le maekrofono ona hofihlēla ba hlophisa ntho eo.

<sup>3</sup> Ruri ona ke e—e monyetla o moholo ho 'na, 'me ke—ke ruri motlotlo ho molulasetulo, le nqa khaolo ea Full Gospel Business Men mona Yuma, le bakeng sa bareri bohole. Libini tse khabane tsena mona, li ne li nyolohetse mona nakoana e fetileng, nka rata ho ba utloa mono e—e kōpanong. O ne o hlile o babatseha. Ke—ke sa tsoa ipotsa, ha ba ntse ba bina, haeba Johanne a mpone. 'Me ke a tšepa o entse hoo. 'Me, ka hona, ha ke utloa le tšoere tsoseletso mona. Morena a le hlohonolofatse ka moéno, moena le khaitseli, ha le ntse le sebeletsa. 'Me ho metsoalle ea ka eohle mona Phoenix le libaka tse fapaneng, tse leng...le ho tsoa koana California.

<sup>4</sup> 'Me ke batla ho bua lethoana ka likhaolo. Mohla ke ne ke kōpana le batho ba Pentekosta, ke ne ke...ho thulana le boiphihlelo ba pentekosta, ke sa tsebe kereke ea Pentekosta e le teng. Mohlang oo ke le Missionary Baptist. Ke ne ke amohetse kolobetso ea Moea o Halalelang, ka fihlēla batho ba lumetseng seo ke neng ke se amohetse. 'Me ba e amohetse lilemo tse mashome a mane le pele ke e fumana. Ke le e mong feela, joalokaha Pauluse a buile, ke a kholoa, ha ke leke ho kopitsa mantsoe a hae, empa ke batla ke le "sefolotsana." Empa e... Baena besō ba nkuka ke batla ke khelohile, ke batla ke tlotse

moeli, ka puo ea teng. Empa ka—ka tseba ke amohetse ho hong. Ka hona, boiphihlelo ba ka bo ne bo itšoanela feela le ba bona mono. 'Me ke bo thabela bo le joalo.

<sup>5</sup> 'Me, eitse ha ke kena har'a bona, e—e khang e robang pelō, ke ba khaolelitse ba le likotoana hakaalo feela, ka mekha e fapaneng, joaloka kereke ea hesō ea Baptise. 'Me bao... Ke hopotse ho le hong feela ho bitsoang Pentekosta, 'me e le phetho. Empa, ha ke re pha, mekha ea malumeli a bona e ne e fapanen e le 'maloa. Ka hona, joale, keha bohle ba itōketse. Ke tseba ke kōpane le ba bang ba banna ba khabane ka ho fetisia, bophelong baka, lihlopheng tsena. 'Me bao—bao ba, ehlide, e le mekha e fapaneng ea malumeli. 'Me khopolo ea ka—ea ka eka bohle re tlameha ho ba bang pelōng, le Kreste 'moho, ka hana ho iketsa setlama le mokha ofe oa bona oa bolumeli. Ka ema lipakeng sa bona feela, ke leka ho tšoara matsoho a mabeli, le matsoho ohle, le ho re, "Re baena." Ha re... Re ka tšoha re bona linthoana li batla li fapanen, nqa e mong. Empa, ntle le moo, re sa le baena, hoba re tsoetsoe ka Moea o le mong. Re lelapa la Molimo.

<sup>6</sup> Mohla borakhoebo ba Bakreste, e leng Full Gospel Business Men, khaolo ena, ka na ka kenela likōpano tsa pele le Moena Shakarian. Ke mo tsebile le pele mokhatlo o theoa, kapa motsamao o hlongoa. Ka o hopola e le ntho khōlō. Ebile monyako o butsoeng ho 'na, ho hahlaula machabeng 'moho le Full Gospel Business Men ena.

<sup>7</sup> Mono, ka linako tse ling, u fihlela sehlopha sa bareri, ka linako tse ling, ba arubetsoa ke maikutlo khahlano le sehlopha se seng, ka ha motho a buile taba. Ha se hohle, empa re e fumana litulong tsa selehae. Ntho e kang, ha kereke e 'ngoe e tšehtsa ka matlolle, e 'ngoe ha e amane le eona ka letho.

<sup>8</sup> Empa ka Full Gospel Business Men, ho 'na ebile monyako o butsoeng. Ha ba kena, ke phutha baena besō bohle 'moho, 'me re—re ka sebelisana; koana balisa ba babeli ba ka fihleloa ke maikutlo, kapa se seng. Ona ebile monyako o moholo o butsoeng, ke hahlautse bakeng sa bona machabeng joale ka lilemo, ho bua likhaolong tsa bona.

<sup>9</sup> 'Me Yuma ha e-na toropo e khōlō haholo, leha koana ke hopola e le khōloanyane ho eo ke tsoang ho eona, Jeffersonville, Indiana. Empa ke kōpane le molula-setulo oa lōna mona. Eona... o ne a... le ba fapaneng ba khaolo ea lōna. 'Me ke hopola le fuoe monyetla o babatsehang mona.

<sup>10</sup> Ke ne ke nahanne, bosiusing bona, ke sa lutse mona ke shebile batho. Le a tseba, haufi re tla timelloa ke monyetla ona. Mokhatlo oa Likereke tsa Lefatše o tla re metsa kapele. Ke lekanya boholo ba mokhupi oa ka bosiusing bona bo entsoe ka Mapentekosta, le Mabaptise, le—le Church of God, le bao ba kantle ho Mokhatlo oa Likereke tsa Lefatše. 'Me—'me bao, ba 'nile ba kekella mono feela, 'me Bibele e ba tlalehile ba ne ba tla

etsa hoo. 'Me re lemosoa taba eo, ka hona re suthele hole le eona. 'Me joalokaha ho builoe bosiung bona, sefeleng, ka ho Khutla ha Morena ho haufi, bo ka ba haufi ho feta kakanyo ea rōna.

<sup>11</sup> 'Me ke nahana ha re phutheha ka tšobotsi ea botsoalle bona, e re etsensa se seng, re huleloa haufi le e mong. 'Me ha re atamelana, re boetse re atamela Molimo, hoba Jesu o itse, "Seo le se entseng ba banyenyane bana ba Ka, le se entse ho 'Na."

<sup>12</sup> Ke na le moshanyana ka mona nqa e 'ngoe, ke a tšepa, Joseph. Ke na le Billy ea lutseng mona. Barali ba babeli ba lutse morao mane, le mohats'a ka. Joale haeba motho a tšoere letho le beng le...haeba u batlile ho nketsa ka molemo ruri, le ka mpa la o etsensa bana ba ka ho feta 'na. 'Me ke ikutloa eka, joaloka motsoali... 'Me Ke eéna mohloli oa botsoali. Ke hopola Molimo o ikutloa joalo. Haeba re ka... Re Mo sebeletsa ka ho sebeletsana. Re sebeletsa Molimo joalo.

<sup>13</sup> 'Me ka ho tseba taba ena e le 'nete, ke hopola khafetsa ha khaolo ena e phutheha, hobane e emela evangeli e eang ka lefatšeng lohle... Ehlide Full Gospel Business Men ha e emele thuto efe ruri. Ba emela Evangeli e tletseng feela. 'Me ha motho a fapano, ho itōketse ka bottlalo. Ho itōketse. Re phuthehela botsoalle, leha ho le joalo. Ke hopola e ka ba e... Ha ke ne ke ahile mona motseng ona, ke a kholoa, e ne e etlare ha khaolo eo e phutheha, holane mokhoa ofe o le teng kahohle, nka ba teng mono le ho tlisa mang le mang eo nka mo finyellang. Ke hantle, hobane ke e—ke ntho e re natlafatsang 'moho.

<sup>14</sup> Ke lula Tucson, ke bua khaolong eo khafetsa, ka linako tsohle. 'Me koana Phoenix, esale ke fallela Arizona, ke Phoenix nako le nako ha ke fumana monyetla ho tloha le ho—ho ea Phoenix. Hobane, le ho leka ho tla le motho e mong, ho mema motho, ho tla le bareri ba bang.

Le ho re, "Be, be, u a bona, Moena Branham, ha re khone."

<sup>15</sup> Ke re, "Ha se molato seo u... Mphelehetsa feela. Feheletsa e—e motoalle, feela."

<sup>16</sup> Le ho ba fihlisa mono nakoana. Ke phetho seo u tlamehang ho se etsa. Ebe ba iphanelo, pelō ea motho mang le mang e lapetse botsoalle. Re tlameha re be re etsa seo. Eo ke pontšo e khōlō ea nako ea qetelo. Molimo o sitse khaolo ena. E ke e—e ke e tiee Morena Jesu a tle a be a fihle a re amohele Khanyeng, ke thapelo ea ka.

<sup>17</sup> Joale, ke sa hopola leeto la ka la pele le fetang har'a Yuma. Ke le kahar'a Ford ea Model-T e ka mathang limaеle tse mashome a mararō ka hora. Ke ne ke nahanne ha ke khanna ke kena kajeno. Ke sa tšepahetse ho Ford; ke sa tšoere e 'ngoe, ke sa tšoara letho haese seo. Empa ka... Joale, ha ke rekise li-Ford. Joale, ha se ho e sebeletsa ka thata. Le a bona? Empa ke hopola kamoo Ford eo... Boholo ba lōna baena thaka tsa ka le sa hopola Model T eo ea khale. Mona e le ka 1927. U ne u tlameha ho shebisisa haholo

ho seng joalo u ka fosa Yuma ha u feta. E le nyenyane haholo, le hlile le holile hle. Empa, kamoo ke thotseng limaele tse mashome a mararō ka hora ho Ford ea ka, e mathile limaele tse leshome le metso e mehlano ka *mona*, leshome le metso e mehlano ka *mona*. Ka hona, ha u e kōpanya, ka thola limaele tse mashome a mararō ka hora, har'a litotoma tsohle le tse joalo. Yuma e holile.

<sup>18</sup> Kereke e tlotlehang ena, re ntse re—re ntse re loanela Tumelo e babatsehang ena.

<sup>19</sup> Ke a u leboha, moena, ea entseng seo. [Motho o file Moena Branham ntho—Mohl.]

<sup>20</sup> E holile, le eona, re thabela hoo haholo. Morena a le sitse bohle.

<sup>21</sup> Re a t̄sepa, haeba le le teng, bohaufing, efe ea likōpano tsena... Ke sa na le e—e khaolo mane Phoenix, ho bua, Sontaha se tlang. Le Sontaha se tlang mane Flagstaff. 'Me Mantaha o tlang, la mashome a mabeli le motso o le mong, ke moketjana oa lijo mane Tucson. Lōna bohle le menngoe.

<sup>22</sup> 'Me, ha Morena a ratile, ke batla ho bua mane Westward Ho Mot... Hotel bolorumung, ke a kholoa. O qala bosiu bofe? [Motho o re, "Ke thapama ea Sontaha, la leshome le metso e supileng."—Mohl.] Thapama ea Sontaha, la leshome le metso e supileng, t̄sebetsoana ea evangeli feela. Ho t̄sepa libini tsena li tla eta, haufi le nako eo, ho re thusa. Re tla hlola teng hofihlela Laborarō. Ke a kholoa ke thapama ea Sontaha. Re etsa joalo ho se t̄soenyane le mananeo afe a likereke. Ebe, Montaha le Labobeli, 'me Laborarō re mane Ra... ke West... eona Ramada Inn, Ramada Inn. 'Me Labone re qala Westward Ho. Na ke eona?

<sup>23</sup> [Moena o re, "Westward Ho, Sontaha, Mantaha, Labobeli. Re ntoo ea Ramada Inn, Laborarō, re lula mono hofihlela seboka."—Mohl.] Seboka se fetile, mane Ramada Inn. Re tla thabela boteng ba lōna nako efe.

<sup>24</sup> Joale, pele re phetla Buka ena, ha re inamisetseng lihlooho tsa rōna nakoana ho bua le Mongoli.

<sup>25</sup> Joale, ka lihlooho tsa rōna tse inamiselitsoeng lerōleng leo Molimo o re nkileng ho lōna, 'me, ha Jesu a ka lieha, re tlameha ho khutlēa teng letsatsi le leng. Esale ke fihlile mona feela, ke fumane molaetsa o tsoang bochabela, oa leleitinyana leo ke le tsebileng... Ke ngoananana ea bitsoang Edith Wright. O tlohile ho ea kōpana le Molimo, thapama ena, ka hora ea borarō. Re tlameha ho khutla. Ea ratang ho hopoloa thapelong ha a le teng mona, na u ka phahamisetsa Molimo letsoho la hao. Molimo a le sitse.

<sup>26</sup> Ntate oa Leholumō, joalokaha re ile ra thabela botsoalle bo khabane bona, 'mino, oh, ka hlasimolloa pelō hakakang ho utloa sefela seo, *Na Ebe Johanne O Mpone?* Ntate, ke t̄sepa bohle re tla

ba teng mono, e mong le e mong oa rōna. 'Me joale re inametse nqa lerôle, 'me re—re U rapela ho amohela liteboho tsa rōna—tsa rōna, le pako ea rōna, le thapelo ea rōna nqa e mong.

<sup>27</sup> 'Me joale re phetla Lentsoeng la Hao, karolo e khethelileng ea kōpano e bonahalang e khethelile ho feta—ho feta tsohle, hobane re tseba nakong ena re sebetsana le batho, ho ba isa 'Neteng, ho Kreste le ho Lentsoe, e leng Kreste. Le ho U rapela ho re bulela Lentsoe. Re—re a haelloa, Morena, athe Uena u rabokhoni-bohle. Ke U rapela ho sitsa maiteko ohle a rōna a fokolang, re iphumane bosiung bona esita le malulo a rōna Lentsoeng la Molimo. Aba sena, Ntate. 'Me re tla rorisa Uena, hoba re e kōpa ka Lebitso la Jesu. Amen.

<sup>28</sup> Joale, ehlile ho monate ho fihla mona. Mona ke tšoere lintlha tse 'maloa tseo ke hopotseng ho lebisa ho tsona, metsotso e 'maloa, kaha ke hopola re sa lumelloa ho tšoara holo ena halelele mantsiboea ana. 'Me le 'na, ke batla ke le joalo, har'a batho ba Pentekosta, ke batla ke le lenama, le a tseba.

<sup>29</sup> Ke a hopola. Nkabe ke le boleletse, koana. Khetlo la pele ha ke bona moreri oa Pentekosta, e ne e le Mor. Robert Daugherty ho tsoa St. Louis. Ke belaela a tsebiloe ke mang oa lōna. Le bone bopaki ba ngoanananyana oa hae bukeng. O ne a—o ne a . . . O ne a phekolo St. Vitus tantše, a se a tetsoe. 'Me ke teane joalo le batho ba pele ba Pentekosta.

<sup>30</sup> 'Me, sena, ka ea mo utloa a rera, 'me—'me, khele, a—a khona ho rera. O ne a . . . A sa emele letho. A rera hofihlela a felloa ke moea, a pulufale sefahleho, mangole a hae a keteme, a batle a thulana fulurung. 'Me a khe moea, u ka mo utloa u le qetellong ea motse tlase mane, ho ka thualo, ho nyoloha a ntse a rera. 'Me ka nahana, "Khele, ke—ke batla ke sa khone ho e nahana ka potlako e kaalo."

<sup>31</sup> Ke batla ke tlameha ho nka nako ea ka. Ke batla ke le lenama, ke a tsofala, hape, le a tseba, ho khasa joalo, 'me ke tsepile le tla 'mamella metsotso e 'maloa.

<sup>32</sup> Ntho e 'ngoe e tiileng, eo ke e tsebang e ke ke ea hlolleha, ke Lentsoe la Oona. "Maholimō le lefatše li tla feta, empa Lentsoe la Oona le ke ke la hlolleha le ka mohla." Ha re phetleng joale, haeba le tšoere Bibebe tsa lōna, ke rata ho E bala, Buka ea Esaia, khaolo ea 53 ea Esaia. Ke batla ho bala sena ho haha feela, ho qotsa mohlolithero ho ntša therero, nakoana feela.

*Ke mang ea sea lumetseng seo re se bolelang? . . .  
letsoho la MORENA le bonahetse ho mang?*

*O melile pel'a hae joaloka lehlomela, le joaloka motso o tsoang mobung o omeletseng: ha a na sebopeho leha e le bokhabane; re mo talimile, 'me o ne a se na ponahalo eo re ka khahlisoang ke eona.*

*O nyatsitsoe a furalloa ke batho; ke motho oa bohloko, . . . ea tsebang mahlomola: ea tšoanang le eo batho ba tšabang ho talimana le eéna; re mo nyatsitse, ha re a ka ra re letho ka eéna.*

*Kannete o se a ipelesitse maloetse a rōna, o nkile mahlomola a rōna: empa rōna re lekantse hoba ke ea lauouang, ea otloang ke Molimo, ea hlomolisoang.*

*Athe o hlabetsoe libe tsa rōna, a tetekoa ka baka la bokhopo a rōna: kotlo e re tlisetsang khotso e mo oetse holimō; . . . re pholosoa ka maebe a hae.*

*Bohle re ne re lahlehile joaloka linku; re ne re ea e mong le e mong ka tsela ea hae; empa MORENA . . . mo jarisa makhopo ohle a rōna.*

*A etsoa hampe, a ntse a mameletse, a se ke a ahlamisa molomo oa hae: a le joaloka konyana e isoang hlabong, joaloka ka nku tse semumu pel'a bakuti ba eona, . . . ha a ka a ahlama molomo oa hae.*

*A tlosoa mahlomoleng le kahlolong: 'me ho kile ha lemoha mang har'a leloko la hae? hore o khaotsoe lefatšeng la ba utloang: 'me o otliloe ka baka . . . baka la sebe sa sechaba sa ka.*

*O beiloe lebitleng le ba babe, empa o bile a ba le morui lebitleng la hae; kahobane ha a k'a senya letho, 'me bokhopo ha bo a eba teng molomong oa hae.*

*MORENA o ratile ho mo roba; le ho 'meha tllokotsing: empa etlare hobane a bee ho phela ha hae hore e be sehlabelo bakeng sa sebe, o tla bona peō ea hae, 'me a eketse matsatsi a hae, morero oa MORENA o atlehe matsohong a hae.*

*Ka baka la mofufutso oa moea oa hae, O tla—O tla bona se kholisang: mohlanka oa ka ea lōkileng o tla bea ba bangata ho lōka ka tsebo ea hae; 'me o tla jara bokhopo a bona.*

*Ka baka leo Ke tla mo fa kabelo ea ba baholo, o tla arolelana khapo le bahale; hobane . . . neetse moea oa hae lefu: 'me o baliloe le lhlola; o jere libe tsa ba bangata, 'me o tla etsa merapello batlolí.*

<sup>33</sup> Ke rata ho bua sena, e le mohlolitheryana. Ke ratile ho qotsa mohlolithero mono, ka: *Mosebetsi O Tsoileng-Matsoho Oa Molimo O A Suptjoa*.

<sup>34</sup> Joale, ona ekaba e—e—e mohlolithero ho o bala, ho ntša mosebetsi o tsoileng-matsoho. Empa ha re o talima, ka monahano oa rōna, ekaba sohle ntle le mosebetsi o tsoileng-matsoho, hobane ho itsoe, “Ke eo re tšabang ho talimana le Eéna, ha ho ponahalo eo re ka khahlisoang ke Eéna.” 'Me khafetsa, re bitsa ntho mosebetsi o tsoileng-matsoho, athe Molimo ha o

amanē le eona ka letho. Hobane, bohlale ba motho ke bothoto ho Molimo, athe bothoto ba Molimo bo fetisa ka bohlale bohlalefi bohle ba motho.

<sup>35</sup> 'Me re a bona ka mona, Molimo o re takela setšoantšo sa lethoana. Ke rata ho hlahisa setšoantšo sena pel'a rōna, kaha ke lemoha ekaba khetlo la ho qetela ba bang ba rōna re tla kōpana. Re ka tšoha re sa hhole re bonana hape tjena joale. Ka baka leo, haeba re phuthehile ka morero onā, e se ho bonoa kapa ho utluoa . . .

<sup>36</sup> Empa re ne re phuthehile botsoalleng re tšoletsoe lijo tse hlabosang tsena bosiung bona, tafoleng, re ntse re fepa mebele ea rōna ea nama, 'me joale re rata ha Molimo o ka fepa soule tsa rōna Manna oa Oona o patiloeng. Ke baprista ba inotši ba keneng Sehalalelisisong ba lumelloang ho ja Lijo tsa Oona.

<sup>37</sup> Haeba re lemohile, bosiung bona, seteiki sa rōna—sa rōna. Ha ke lumele nkile ka lula e—e moketeng oa lijo le joale, litulong tsohle tseo nkileng ka tšoara likōpano, o kang oa bosiu bona, moo nkileng ka ja leqa la seteiki se hlabosang se kang seo ba se tšotseng bosiung bona. Joale, le a bona, hobane re ne re tlamehile ho fumana sena; haeba re phela, ntho e ile ea tlameha ho shoa re tle re natefeloe ke nako ena ea botsoalle, le ho baballa maphelo a rōna.

<sup>38</sup> Ke qoqile le monna ea jang meroho feela, nakoana e fetileng, o mpoleletse, "Be, ha ke—ke lumellane le uena." Be, a—a mpehela lengolo, a batlile ho mpona sephiring. 'Me o itse, "Moena Branham, kamehla ke u nka u le monna ea halalelang." O itse, "Empa hoba ke utloe u re u jele borakefese ba nama ea kolobe le mahe," ho re, "seo—seo sa nkatla."

<sup>39</sup> Be, seo, ke sa batle ho mo alla kutu e khopang tseleng. Joale, eo ke tumelo ea hae. Empa ka re, "Be, monghali, ha ke sa je, ha ke phele."

<sup>40</sup> O itse, "Empa, u a bona, u ile oa tlameha ho ja kolobe, le—le ho bolaea khoho."

<sup>41</sup> Ka re, "Monghali, re phela feela ka lintho tse shoeleng. Ha ke tsotelle seo u se jang. U ja meroho. U a ja. U ja bohobe, koro e shoele. Ha u ja poone, poone e shoele. Ha u ja linaoa, naoa e shoele."

<sup>42</sup> Sohle seo u se jang, u ka phela nameng feela hobane ntho e shoele hore u tle u phele. Joale, sohle seo u se etsang, esita le ho noa lebese, eona bakteria, e ka bang eng, u tlameha ho phela ka ntho e shoeleng. 'Me taba eo e paka feela, haeba re tlameha ho phela bophelong bona ba tlhaho, 'me re ka e phethisa feela ka ntho e shoeleng, ntho e ne e tlameha ho shoa ho re phelisa ka Bosafeleng. Eo ke Jesu Kreste, eo Molimo o re neileng eéna e be thekollo ea rōna.

<sup>43</sup> 'Me joale, khetlo la pele ha ke kōpana le batho ba Pentekosta, ke—ke ile ka ea California, seteiti se mabapi le sena feela, mose ho nōka. 'Me ke ne ke le Los Angeles. Ha ke a phela mehleng ea moreri ea tummeng enoa oa leleiti, Mof. Semple... Aimee Semple McPherson. Nkile ka teana le mora oa hae, Rolf, khabane ea monna oa Mokreste, le—le mohatsaé le lelapa la hae. Ke batho ba ratehang ruri, le Ngk. Teeford le moifo o moholo mane Angelus Temple. 'Me ke rerile Jubilee ea Pentekosta, Jubilee ea lilemo tse mashome a mahlano mono, lilemong tse 'maloa tse fetileng, ka kenela nako e babatsehang ruri.

<sup>44</sup> Ho lebisa hlompho ho mosali enoa ea behileng mohlala, ho leka ka bokhoni ba hae, le ho—ho hlahisa se lutseng pelōng ea hae, ka mo tlota ka ho chakela lebitla la hae holimō Forest Lawn. 'Me eare ke sa eme mono ke rotse katiba ea ka, le—le ho inamisa hlooho ea ka le ho leboha Molimo ka bophelo bo hlophehileng ba lekhabunyane lena, eaba ke koptjoa ke moifo oa ka, sehlopha sa bareri, haeba nka rata ho haola le... hohle le Forest Lawn. 'Me kahar'a moshara mono, kapa le e bitsa'ng, eaba ke bohile meralo e fapaneng, le ho bona Sellalo sa Morena, le ho lula. 'Me bongata ba lōna le se lemohile, ha ba se khantša ka mabone, Selallo sa Qetela, le utloile pale ea sona.

<sup>45</sup> Empa ke bone e 'ngoe ea lintho tse tsoileng tjaro mono, e le ha u kena monyako, ke a kholoa ka nqa bochabela. Mono e—e le sefika sa Moshe, e bileng moqhaka oa mosebetsi oa bophelo oa Michelangelo, ke a kholoa, 'metlatšoantšo, seo... nka tšoha ke tlaitsse monna eo. Ke a lumela ke 'nete. Michelangelo, seo—seo... 'metlatšoantšo e moholo ea teileng ntho eo, kapa tšobotsi ea Moshe. 'Me ea re a sa se hhalosa, e—e lesupatsela le re tataisitseng, la o tlaleha e le o mong oa mesebetsi e meholohali ka ho fetisa e tsoileng-matsoho e teiloeng ke Michelangelo le ka mohla. A o tlaleha o mentse karolo e khōlō ea bophelo ba hae, mosebetsi o boima.

<sup>46</sup> Ka ntso lemoha, ke a kholoa, holim'a lengole le letona. Sefika se bonahetse se phethahetse, se le phollatsi, 'me Moshe a tšoere tafole ea melao letsohong la hae, litelu tsa hae tse telele. 'Me eona, ehlide, e le kakanyo ea monahano oa Michelangelo, tšobotsi ea Moshe. Koana e ka ba o ne a eso bone le pikchara, empa, kelellong ea hae ka sebele, a taka seo a lekantseng Moshe a tšoanetseng a le sona.

<sup>47</sup> 'Me pale e a tšoella, hang hoba a phethele e—e sefika, 'me sohle se hohliloe ka phetheho, a emella morao a boha mosebetsi oa hae. 'Me eareha a susumetsoa hakaale, se ne se shebeha hakaale... Seo a neng a se fupile mohopolong oa hae, a se bopile ka letsoho la hae. Se ne se tšoana le sona hakaale, esale a se emetse lilemo tsena tsohle, o bile a haptjoa ke tšusumetso e kaale, a se otla lengoleng a hlaba litlatse, "Bua!" 'Me tulo e khephotsoe mono e—e moomong, lengoleng la Moshe, moo Michelangelo a teileng ka noto ea hae, hoba a kile a susumetsoa hakaale.

<sup>48</sup> Le a bona, ntho e kileng ea boba ka ho eéna, tšimolohong, a taka setšoantšo sa kakanyo ea setšoano sa Moshe. 'Me hoba a se bone se halimisitsoe ka pel'a hae, seo a kileng a se fupa kelellong ea hae, kamoo a kileng a hopola Moshe a tšoanetse ho shebeha kateng; 'me esale a kakatletse pono eo lilemo le lilemo tseo tsohle, a qotsa sekotoana sa lejoe la kranaete, le ho qhetsola sekotoana mona le sekotoana mane, a se tšoatile, hoba se tlameha ho hlahella ka bophethehi. 'Me hoba se phethehe ka pel'a hae, o—o bone khalimiso ea se neng se bobile mohopolong oa hae. Ke sona se mo susumelitseng hakaale, ho otla setšoantšo seo, le ho hlaba littlatse, "Bua!" Lilemo tsohle tsa mokhathala oa hae li ne li lefile. Mosebetsi o moholo oa matsoho a hae o phethiloe.

<sup>49</sup> Joale re bona seo, eaba ke—ke susumetsoa ke sona, hoba ka se nahaniisa, ruri, letšao la moomo, le se entse, ho 'na, mosebetsi o tsoileng-matsoho. Hobane, feela, holane e bile setšoantšo se seng feela, kapa ntho e itseng e amanang le Moshe, seemo sa mofuta sa kakanyo ea monna ea itseng. Empa, monna ea entseng mosebetsi, oa mo khotsofatsa hakaale hofihlela a se otlide. 'Me ho 'na letšao le holim'a sona le se fetotse mosebetsi o tsoileng-matsoho, hobane le halimisitse ka bophethehi se neng se bobile mohopolong oa hae maloka le chebeho ea Moshe.

<sup>50</sup> Oh, ka ema mono. Ka tlameha ho sutha metsotso e 'maloa, ho nahana ka—ka se tšoanetseng se be se se lekantsse ho eéna, le—le seo se se lekantseng ho 'na lekhatheng leo. Eaba sena se mphihlela mohopolong, sena seo ke batlang ho bua le lōna ka sona.

<sup>51</sup> Ha re suthiseng mehopolo ea rōna ho Michelangelo, ho fallela ho 'Metli e moholo, Molimo o Matlaohle, Oona, oo tšimolohong, le pele mafube kapa letsatsi le chaba, le pele athomo kapa molekule li e ba teng. Molimo, mohopolong oa Oona, o no o hopotse motho, kamoo motho a tlamehang ho shebeha kateng, seo a tlamehang ho ba sona, le kamoo a tlamehang ho itšoara kateng. 'Me O batlile hore monna eo a fetohe karolo ea Oona, "Eaba O etsa motho ka setšoantšo sa Oona ka sebele, Oa etsa motho ka setšoano sa Molimo," oh, mohla Molimo, tšimolohong, o nong o etsa mosebetsi ona o tsoileng-matsoho, ntho e halimisitseng mehopolo ea Oona.

<sup>52</sup> Hopolang, sebopheho sa Bophelo Bosafeleng se seng feela, 'me ea rōna... esita le mabitso a rōna le mehopolo ea rōna e be e le ho Molimo le pele ho motheo oa lefatše. Hobane hona joale re ruile Bophelo Bosafeleng. 'Me ho ba seo, re tlameha re be karolo ea Molimo. Ka hona re tla tlameha ho ba mehopolong ea Oona hakaalo, hoba re ruile Bophelo Bosafeleng, 'me re ne re rereloe bophelong bona. "'Me mabitso a rōna a ne a ngoloe Bukeng ea Bophelo ea Konyana le pele ho motheo oa lefatše," ho latela Tšenolo. Joale, Molimo oo o no o re bolokile mohopolong oa Oona, ha ho le joalo re ruile Bophelo Bosafeleng, hoba O re buile mohlang oo, ra ntoo ba teng. 'Me lentsoe ke mehopolo

o bonahetseng feela. Molimo o no o re bolokile, tšimolohong, mehopolong ea Oona.

<sup>53</sup> Joale, mohla O etsang Adama, motho eo oa pele, e ne e phethahetse hakakang. O ne a itšoanelā le Molimo. Molimo, Moea o Halalelang o moholo, o fuamang lefatše lohle, 'me Oa . . . eaba linonyana li a tsoa, re ka rialo, le liphoofolo, le lintho tse fapaneng, tsa 'na tsa ipha seboleho sa Ea ntseng a fuama. Ebile, qetellong, ho hlaha mofuta o tšoanang hantle le oa Ea ntseng a fuama, Molimo oa, kapa . . . Motha a etsoa ka setšoantšo sa Molimo. Ka hona, mohla O nong o mo bea tšimong e khōlō ena. Joaloka Michelangelo a kile a bea mosebetsi o moholo oa bophelo ba hae, le babetli bohole ba baholo, Molimo oa hloma mosebetsi oa liatla tsa Oona tšimong ea Edene, oa mo etsetsa mothusi. Ea eba e—e—e khotsafalo e phethehileng hakakang ho Molimo, O bileng oa phomola. E ne e le phomolo feela. Mosebetsi oa Oona o phethiloe.

Eaba ho fihla pale e boholoko, ea sera.

<sup>54</sup> Joale lemoha. Ke batla le hopole taba e le 'ngoe ena, hore Molimo o file motho enoa tšireletso. Oa mo nea . . . Oa mo tinketsa ka Lentsoe la Oona, hoba Oa ba bolella seo ba ka se etsang, seo ba ba ke keng ba se etsa.

<sup>55</sup> 'Me le kajeno re behiloe motheong oo, seo re ka se etsang, seo re ke keng ra se etsa. Ho sa tsotelehe ho lōka ha rōna, re tsamaea kereke hakae, kapa ho etsa *sena*, re tšoanelā ho tsoaloa labobeli. Le a bona? E tšoanetse joalo.

<sup>56</sup> 'Me Molimo boleletse Adama seo a ka se etsang le seo a ke keng a se etsa. Oa mo hloma ka morao ho Lentsoe la Oona.

<sup>57</sup> Eaba sera se kena, ka thetso, sa khasa se phunya marako a Lentsoe la Molimo, hoba sa buleloa monyako, sa senya setšoantšo seo, ho etsa sebe. Ke 'ngoe ea lipale tse boholoko boseleselē eo.

<sup>58</sup> Ho nahana, motho ea entsoeng ka setšoantšo sa 'Mopi oa hae, a filoe lerako ho ema ka morao ho lona, Lentsoe leo le ke ke la hlolleha le ka mohla. Eo—eo ke tšepo ea Mokreste. Ke—ke thebe ea hae. Ke sehlomo sa hae. Ke lefika la hae kajeno, ke seo, ho ema ka morao ho Lentsoe; molumeli e mong le e mong.

<sup>59</sup> Joale, ha u a tšoanelā ho sutha ka morao ho Seo le ka mohla. Ha u etsa, uena, u bulela sera monyako, ha ba re, "Oh, be, u ka etsa lethoana *lena*, le lethoana *lane*." Molimo o u batla u ikarotse le sohle se bitšoang sebe. Ho ikhethela Oona ka botlalo kathoko, homme Oona o inotši.

<sup>60</sup> O na le morero bophelong ba hao, motho ka bomong, ha ho motho bophareng ba lefatše ea ka tlatsang malulo a hao. Molimo o u boloketse se seng. U entsoe ka tsela eo. O entsoe joalo ka morero. Molimo o ikemetsé mosebetsing oa Oona. Ekasita O . . . Lintho li fapane. Re fapane, e mong nqa e mong.

<sup>61</sup> Re eleloa bophelong ba liphooftolo. Re fumana seo, bophelong ba phooftolo, e teng phooftolo, Molimo o entse sebata sa pelesa, se kang pere, 'me—'me e tlameha ho sebetsa. 'Me khomo ke sehlabelo. 'Me, empa, e—e tau le nkoe li sasanka morung li sa sebetse kapa le letho. O entse phooftolo e khōlō e kang tlou, le ho etsa mootloana o sa tsebisaheleng o kang toeba. Joale, ke mang ea leng teng ho bolella Molimo ho etsa'ng le mokhoa oa ho e etsa? O e etsa ka mokhao oa Oona ka Sebele.

<sup>62</sup> O etsa lithaba. O etsa mahoatata. O etsa e—e maoatle. O etsa lithota. O etsa sefate sa mofuta o mong, lehong le thata, palema, le—le joalo-joalo. O a e etsa.

<sup>63</sup> O etsa banna ba fapaneng. O re nea, e mong le e mong, malulo a fapaneng. 'Me sefate sa palema se ke ke sa fetoha hikori le ka mohla. Sefate sa hikori se ke ke sa fetoha palema le ka mohla. Ha ho mang ea ka tlatsang malulo a hao, le uena ha u a tlameha ho leka ho nka malulo a motho e mong. Hobane, u motho ka bomong, ho Molimo, 'me Molimo o u behetse morero. O u entse joalo. U re, "Hobaneng O entse hoo?" O ikemetse. O na le lebaka la eona ho ba joalo.

Empa re iphihlela bohole re sirelelitsoe ke Lentsoe.

<sup>64</sup> Leholimōng, re sheba makhotla a sebaka. Bibele e bolela naleli e 'ngoe e le hosele ho e 'ngoe. Ho na le Sirius le tse fapaneng. Le Mars le Jupiter, tseo tsolah tse fapaneng, li hosele e 'ngoe ho e 'ngoe. Letsatsi le hosele le khoeli, le khoeli ho linaleli. 'Me ho be le Mangeloi, a kang, ho na le Lirafime le Likerubime, le Mangeloi le Mangeloi a maholo, ka—ka hlahlamano. 'Me lefatšeng le lecha le tlāng ho tla, likhosī tsa lefatše li tla tlisa hlompho ea tsona motseng.

<sup>65</sup> Re tla lula re le joalo kamehla. Hobane, Molimo ha se Sears and Roebuck Harmony House. Ke Molimo oa liphaphano. O etsa e mong ka hosele, le e mong ka tsela e sele. Empa re tšoanelia ho Mo sebeletsa kamoo Molimo o re entseng, le ho thaba, le ho lula ka morao ho Lentsoe la Oona. 'Me Molimo o e entse ka tsela eo.

<sup>66</sup> Empa hoba re fumane sera se phunyelelitse Lentsoe leo, nqa sena, mosebetsi oa seatla sa Molimo, sa o senya. 'Me joale se etsa hona hoo hantle. Se phunyeletsia mosebetsing oo oa seatla, sera se etsa seo, se leka ho cheta Mokhatlo oa Likereke tsa Lefatše. 'Me motho o entse . . . Khele, motho ha a lumellane le e mong, re ka khontša lefatše lohle ho lumellana le motho joang? 'Me hang feela ha u etsa seo . . .

<sup>67</sup> Re tšoanelia ho kena kutloanong le a Mong, eo ke Molimo. "Me Lentsoe le ne le le tšimolohong, 'me Lentsoe le ne le le ho Molimo, 'me Lentsoe e ne e le Molimo." 'Me Lentsoe le lula e le Molimo, e tla be e sa le e le Molimo, hobane Molimo o Lentsoeng. "'Me Lentsoe le ne le etsoe nama la aha har'a rōna," ka ho Motho eo Mora oa Molimo.

<sup>68</sup> Joale re a fumana, hore, hoba O fumane tšenyo e khōlō ena. Ekare, holane ebile 'na le uena, holim'a re tsetete nako e kaalo le maiteko, re ne re tla rahela ntho eo koana re e tlohele. Empa, e seng Molimo. O ne o sa rate ho tlohela mosebetsi oa Oona o ntse o senyeha. Ke lona lerato la Molimo. Ha ho makatse seroki se boletse:

Hola ra tlatsa maoatle ka enke,  
 Hola lipakapaka li entsoe letloana;  
 'Hlokoana ka leng lefatšeng e be lesiba,  
 Motho ka mong e le mongoli ka khoebo;  
 Ho ngola lerato la Molimo holimo  
 Ho ka omisa maotlatle khhere;  
 Ebe na mangolo a mennoeng a ka ngola tsohle,  
 Leha a sarolotsoe leoaping ho ea leoaping.

<sup>69</sup> Ho bona lerato la Molimo! Hoba motho a tlole a bulele sera monyako ka boomo, le ho kena ho mo senya, ho mo kenya lefu, le joale Molimo ha o a rata hobane ntho ena e fekisoe. Oa theoha oa boela oa qala hape. O tla boela o etsa motho eo hape.

<sup>70</sup> Oa bea Adama holim'a selekane, "Etsa sena, 'me e seng sena; sena, 'me e seng sane; u se ke oa ama, u se ke oa tšoara, u se ke oa latsoa."

<sup>71</sup> Empa re a fumana, ha O ne o qala hape, Oa qala ka—ka Abrahama. 'Me ho Abrahama Oa mo qala ka selekane se sa theoang holim'a lipehelo. Ha se "ha u ka khona." "Ke se ke entse. Ke se ke e entse. Ke u hlohonolofalitse, uena le peō ea hao, le joalo-joalo, e u latelang." E ne e le selekane se sa eeng ka liphel. Oa qala ka Abrahama, mosebetsi oa seatla sa Oona hape, 'me joale ka selekane sa Oona se sa eeng ka liphehelo. Hape, re a fumana, O se thea holima'a Abrahama ho mo nea selekane, se sa eeng ka liphehelo, ka pallo.

<sup>72</sup> Eaba O tla ho bapatriareka, re hlaha khetlo le latelang, kahar'a Testamente ea Khale, ha re ntse re theoha. Mona O ile oa pepesa motheo oa mosebetsi oa Oona. Joale re fumana Abrahama, Isaaka, Jakobo, Josefa; bapatriareka ba bane.

<sup>73</sup> Joale, Abrahama o ne a emetse mosebetsi oa tumelo, tumelo, hoba Abrahama e ne e le tumelo. A ruile tumelo e khōlō, hobane, "A se ke a sisinyeha pallong ea Molimo, ka ho hloka tumelo." Mohlang, re ka rialo, "ho engoeng kamoo thakali e fatelang," le sohle se eme khahlano le eéna, a 'na a tiisetra Molimo.

<sup>74</sup> Re ntoo fihlela Isaaka, e beng e le mora ea ratoang, ea supileng lerato. Hobane, Abrahama e ne e le papiso ea Molimo, Isaaka o ne a nyeheloe, Genese 22. Re mo fihlela a jere patsi ho nyoloha leralla. 'Me sohle sa taka Kreste, seriti sa Hae. 'Me eaba pheleu e fihla e nyeheloa sebakeng sa hae.

Joale e ne e le tumelo, lerato.

<sup>75</sup> 'Me Jakobo, e bolelang "moqhekanyetsi," 'me eona ke mothetsi. 'Me re eeloa bophelo ba Jakobo bo hlile ba supa mohau, hobane e ne e le mohau oa Molimo, ka linako tsohle, ka Jakobo.

<sup>76</sup> Ha ntoo fihla Josefa. Ha ho letho khahlano le Josefa. E ne e le mophethehi. Moporfeta oa Molimo ea tsoang har'a banababo. Le ho hlouoa, ho se lebaka, le ho rekisoa. 'Me tšobotsi efe le efe, bophelo ba hae bo supile bophelo ba Jesu Kreste. "O tlie ho ba Habo, ba Habo ha ba ka ba Mo amohela." Joaloka Josefa ea kileng a hlouoa ke banababo, a liheloa lemeneng, a lekanngoa a shoele; ho ntšua, ho phahamisetsoa letsohong le letona la Faro. Enereha a tloha teroneng, ba letse terompeta, le a tseba, lengole ka leng la tla meha ho khumama, le ho Josefa.

<sup>77</sup> Re fumana Jesu a batla a rekitsoe ka theko ea Josefa. Eaba o ntšoa teng—teng sekoting; le ho nyolleoa Leholumōng; ho lula letsohong le letona la Molimo. 'Me mohla A tlohang Nqalong eo, "Terompeta e tla lla, le lengole ka leng le khumame, le leleme ka leng le bole ho Eéna," phetheho.

Eo e ne e le tumelo, lerato, mohau, le phetheho.

<sup>78</sup> Ha ntoo fihla mosebetsi oa 'mele, oa mosebetsi o moholo ona o betliloeng. O hahile mosebetsi oa 'mele ka baporofeta. Baporofeta e ne e le mosebetsi oa 'mele.

<sup>79</sup> Qetellong ha fihla hlooho ea 'mele o moholo ona, eona e le Kreste ka Sebele. Baporofeta bohole ba Mo boletse pele. Mosebetsi ohle oa motheo o Mo boletse pele. Tsela eohle ho qala tšimong ea Edene, hona mohla A neng a qala, "Ke tla bea hloeano mahareng a peō ea hao le peō ea nōha." 'Me re fumana A qalile mono, le ho nyoloha ka—ka bapatriareka ho kena ho baporofeta, le ho tsoa mono. Hang hape Oa boela oa bona khalimiso ea Oona ka sebele, mohla ho neng ho tsoaloa monna a le mong lefatšeng, ho tsoa popelong ea mosali, e le Mosebetsi oa Molimo o tsoileng-matsoho. E ne e le Mora oa Molimo, Jesu Kreste. Lebaka la Hae ho ba joalo, hobane E ne e le Lentsoe ka bophethehi.

<sup>80</sup> "Lentsoe le ne le le le tšimolohong, 'me Lentsoe le ne le le ho Molimo, 'me Lentsoe e ne e le Molimo. 'Me Lentsoe le ne le etsoe nama 'me la aha har'a rōna."

<sup>81</sup> Joale re bona ka ho Eéna ho halimisitsoe mosebetsi o phethehileng o tsoileng-matsoho. O ne a phethehile hakaale, a tšoana le Molimo, O bile a re, "Ekare ha Ke sa etse mesebetsi ea Ntate oa Ka, le se ke la lumela ho 'Na. Leha koana Ke... Ha le lumele ho 'Na? Le mpe le lumele mesebetsi, hoba eona e a le pakela, Ke Mang." Ke rata seo. Le a bona? O itse, "Ekare ha le sa lumele ho 'Na..."

Ba itse, "Uena u leng Motho, u iketsa ea lekanang le Molimo."

<sup>82</sup> O itse, "Ekare ha le sa lumele ho 'Na, le lumele mesebetsi eo Ke e etsang. 'Me ekareha ha Ke sa etse mesebetsi ea Ea Nthomileng, ha le a tlameha ho lumela ho 'Na."

<sup>83</sup> Le Mokreste ka mong o a tlameha, kajeno, ho kakatlela bopaki bona boo. Ekareha Lentsoe lena la Molimo la pallo, ekareha maphelo a rōna a sa lōkele a sa nyallane hantle feela le seo Lentsoe le se boletseng, ha re na tokelo ea ho ipitsa Bakreste haeba re sa tsoaloa labobeli. Jesu o itse, ho Mareka 16, "Mehlolo e tla tsamaea le ba lumelang ke eona ena." Le a bona? E seng "ba ka khona; ba tlameha joalo; ba ka tšoha ba khonne." Ba tla e etsa. Ke eo 'Metli ea re entseng. Ke eona Kereke e khephotosoeng. Oo ke—ke 'Mele oa Kreste.

<sup>84</sup> Joale re o fumana o Mo halimisitse ka phetheho. 'Metli joale o ne a boetse a halimisitse Lentsoe ka Mosebetsi o tsoileng-matsoho, oo o bitsoang Mora oa Oona, Molimo, Emmanuel. Nahanang feela, taba eo, motho ea inehetseng hakaale hofihlela Molimo o Itšupile ka mono, 'meleng oo, 'me A fetoha... Eéna le Molimo ba eba bang. "'Na le Ntate oa Ka re Bang. Ntate oa Ka o ahile ka ho 'Na. Ke etsa se khahlisang Ntate kamehla."

<sup>85</sup> Holane Mokreste kajeno a ka kakatlela bopaki bo kang boo? Le ka fetoha mosebetsi o tsoileng-matsoho hantle mona Yuma, seterateng. Leha u le mosali-mohlatsoi kantle mona kamorao ho bathe ea ho hlatoetsa, u ka ba mosebetsi o tsoileng-matsoho ho Molimo, u ka re, "Ke etsa se khahlisang Molimo kamehla," 'me lefatše lohle le ka bona e—e mosebetsi oa Jesu Kreste o halimisitsoe ho uena.

<sup>86</sup> Ho thoe, mehleng, gauta ea khale, ke pele ba sibolla seqhibilisi. Eona... Ba ne ba tšoara gauta ba e batola, mobatoli, Maindia litšung tse qalang mohlang oo Arizona e sa khasa. Ba ne ba batola gauta hofihlela mobatoli a bone khalimiso ea hae kahar'a gauta. Ba batole tšepe eohle ea paerete, lithole, lerole, ho eona, hofihlela mobatoli a bona khalimiso ea hae joaloka seipone, ho batolaka.

<sup>87</sup> Joale, le Evangelie etsa joalo. Boholo ba batho ha bo batle ho phetoloa joalo le ho batolakoa. Be, seo kereke e se hlokang bosiusing bona ke ho batolakoa ho mahetla, ha mehla-ea-khale, ha Moea o Halalelang, ho ntša lefatše le lintho tsa lefatše. Ke seo Pentekosta e se hlokang bosiusing bona. Metsamao ea rōna e hloka hona hoo bosiusing bona, ke ho batolakoa ho mahetla, ha mehla-ea-khale, ho phetholoa-ha-gauta, hofihlela lefatše lohle le batotsoe le phorotsehile ho rōna, 'me Jesu Kreste a halimisoa.

<sup>88</sup> Ntumelleng ho qhautsa bathoana ba tlalang seatla bana bosiusing bona, ba ikhethetse Kreste ka botlalo, le maphelo a bona a inehetse Kreste. Nka phethisa tse ngata ka ho tlalang seatla hona, kapa Molimo o ka phethisa ho fetisang, ke rialo, ka batho bana ba tlalang seatla mona, ho feta seo u ka se finyellang ka Mokhatlo ohle oa Likereke tsa Lefatše, nqa 'Muso oa Molimo.

Monna a le mong ea inehetseng matsohong a Oona ka botlalo, ke ho phetho hoo Molimo o ho hlokang.

<sup>89</sup> Empa, le a bona, ha re ikemisetsa ho ithoballa ka khutso le ho Mo lumella ho batola lephako *lena*, lephako *lane*, ho koqola *sena*, ho koqola *sane*, ho koqola khopolo *ena*, le *sane*, le ho lumella Jesu Kreste ho halimisoa ka ho rōna. Re boha limovi tse ngata haholo. Re tšoere thelebihene tse ngata haholo. Re tšoere boithabiso bo bong bo bongata ba lefatše, hofihlela kereke e lahlehetsoe ke tatso ea eona bathong. Hobane Moea o Halalelang o a tsoa, 'me ho kene ho hong. Ke hantle, metsoalle.

<sup>90</sup> Ke mamela mapaki, Mapentekosta a mehla-ea-sekhale, kamoo ba rapetseng bosiu tšekhe. Bontata rōna le bommé, lilemo tse mashome a mane, tse mashome a mahlano tse fetileng, ba ne ba rapela bosiu tšekhe. Ba ne ba hluoue ke batho, seterateng. 'Me re a nahana, kajeno, ha motho e mong le e mong a sa re phathatse lehetleng, khele, phoso e teng ka rōna. "Le malimabe ha batho bohle ba bolela botle ka lōna." O ile a nyatsuoa 'me a lahloa ke batho, 'me re setšoantšong sa Hae. Amen.

<sup>91</sup> Seo re se hlokang kajeno ke likōpano tse itseng tsa makhonthe, tsa makoma tsa thapelo, tlhoekeiso ea mofuta, ho qala holimō koana sefaleng ho isa ho mohlokomeli, ntlu eohle e hloekeiso, ea Molimo, ho batolakoa, ho halimisa Setšoantšo sa Mobatoli, Evangelie reroe ka matla a tsoho ea Kreste. Ke hantle.

<sup>92</sup> Evangelsoana ena ea bochaba eo re khemisanang le eona, le ho phathatsa *enoa* lehetleng, le ho hloma *enoa* motikone, le *eane* molaola-selika, kapa selo se kang seo, tse peli tseo ke lipolotiki. Na ke sona hantle se hlahileng Nicaea Roma? Re batla ho siroha nyee eo. Bamethodise, Mabaptise, Presbeteriene, Mapentekosta, le bohle, re tšoanelo ho tsoela kantle ho ntho eo.

<sup>93</sup> Lipolotiki ha se tsa Kereke. Moea o Halalelang o tlameha ho hapa Kereke, e seng voutu ea sepolotiki ea mang ke mang. "Molimo o beile kahar'a kereke ba bang baapostola, ba bang baporofeta, le ba bang baruti, le baevangeli, le balisa." Ba sa vouteloa ke batho ka mono. Molimo o ba beile ka mono, ka pitso ea Moea o Halalelang, litšebeletso tsa thapelo, le ka pehō ea matsoho, le ho lula pel'a Molimo.

<sup>94</sup> Empa, kajeno, re fetotse borapeli ba rōna bochaba ebile bo itšoanelo le lipolotiki, bobona, tseo re li bapalang kahar'a mekha eohle ea malumeli a rōna. Re a . . . E mong a ke ke a supa e mong ka monoana. Re molato bohle. Ka mono u fumana banna ba itseng ba makoma le basali ba makoma. Empa bothata, seo ke se nahanneng, re kekella haholo lehlakoreng la-la paloana e nyenyane, batho ba makoma ba batlang ho lumela 'me ba batla matla a Molimo. Ba bangata haholo ba sotetsoa feela ka khato ea bochaba, "Be, *enoa* ke monna ea lōkileng. Ke mothaka ea khabane."

<sup>95</sup> Re na le likereke tse khabane. Re haha likereke tse khabane, le likereke tse fetisang ka bokhabane tseo re kileng ra li rua. Hoo hohle ho itoketse. Ha ho letho khahlano le seo. Ke rata ho bona kereke e atleha.

<sup>96</sup> Empa, moena, nka mpa ka e bona e atleha matleng a Morena ho feta ho atleha linthong tsa lefatše. Ho khutlela morao ho Evangel hape! Ho khutlela morao ho matla a Molimo! Ho khutlela ho pentekosta, eona . . . joaloka ea tšimolohong. Empa, le a bona, bothata ba eona, ha re batle ho batolakoa hoo.

<sup>97</sup> U ka bua taba ka ntho, le ntho e hananang le boitšoaro e etsoang ke kereke, kapa–kapa ntho ea boithabiso, ba u furalla hantle mono, ho koala menyako. U ke ke oa kena, le a bona, hobane ba épá pitso 'me ba u koalla kantle. Ha ba sa u batla hape. Ba re, "U a hlanya. U lahlehetsoe ke kelello." Empa ha feels a le HO RIALO MORENA, ho 'na seo motho a se buang ha se lebaka. Ho qosa matla a Kreste ho fetola motho. Ho qosa matla a Kreste ho baballa motho.

<sup>98</sup> Joalokaha Jesu a buile ka mohla o mong, "Le lekanye mehalalitsoe. Ke re ho lōna esita le Salomone, ka khanya eohle ea hae, ha eso apare joaloka e 'ngoe." Salomone, ka khanya eohle ea hae, e ne e khahla pono. Ntle le pelaelo. E ne e le ntho e khōlō ho lefatše, le monna e moholo pel'a Molimo. Empa kobo ea Salomone e ne e se na bophelo. E ne e le sekotoana sa lesela, ekaba e kutiloe mokokotlong oa nku. Empa, mohalalitoe o ruile bophelo.

<sup>99</sup> Seo re se hlokang kajeno ke Bophelo ba Kreste ka ho rōna. Ke hona ho hloekisang, ha se bokantle, lepetu le hetlileng la hempe, kapa ligara tsa saekoloji, kapa se seng. E qosa matla a Kreste ea tsohileng ho re etsa seo re tlamehang ho ba sona. Molimo ha o a koetla leano le leng lesele haese ho lumella Moea o Halalelang ho busa le ho rena holim'a Kereke.

<sup>100</sup> Oh, Molimo, O ne a bopeletsoe setšoantšo sa Molimo hakaale, hofihlela Eéna le Molimo ba le Bang. "Na le Ntate oa Ka re Bang." Oh, banna! E ne e le bophelo bo bokakang boo, ho Molimo ho phela hakaale ka ho Eéna, hofihlela bophelo bohole ba Hae bo phuthetsoe ka Molimo. Ha ho makatse e ne e le mosebetsi o tsoileng-matsoho!

Satane o tla ho Eéna.

<sup>101</sup> Enereha Molimo o hopotse O thotse mosebetsi o tsoileng-matsoho, Satane a kene. O kene ho Moshe, a roba melao. Empa mohla a fihlang ho Mosebetsi ona o tsoileng-matsoho, e neng e le khetho ea Molimo ka sebele. Amen. O ne a—O ne a Mo rerile pele. Ha e a mo thusa ka letho. A lula a tšepahetse ho Molimo, mohla Molimo o Mo shebileng le ho Mo bona a lekoa matsatsi a mashome a mane felleng, joaloka Moshe. Ehlide, banna bao bohole ba Mo bapisitse ka seriti. Molao o ile oa pshatloa. Empa mohla a fihlileng, Satane, moleki e moholo, 'me o lekile ho Mo leka,

o iphumane a sa thola Moshe mono. Che, monghjali. O thutse liwatte tsa divoloto tse likete tse hlano tse tlabotseng masiba a hae ha a Mo pharumela.

<sup>102</sup> “Ho ngoliloe,” O boletse. Le a bona? Adama o inehetse. Empa, Jesu, Adama oa bobeli, Mosebetsi oo o tsoileng-matsoho o tlisitsoeng, e tle e be Molopolli, O itse, “Ho ngoliloe, ‘Motho a ke ke a phela ka bohobe feela, empa le ka Lentsoe le leng le le leng le tsoang molomong oa Molimo.’” Mono A fumane Mosebetsi o tsoileng-matsoho. E, monghali. O buile taba esele. O itse, “Ho boetse ho ngoliloe, ‘U se ke oa leka Morena Molimo oa hao.’ Tloha mona, Satane.” E ne e le Mosebetsi o tsoileng-matsoho oo. O ile a etsa’ng?

<sup>103</sup> Ha se ho re, “Ke tla bolella kereke ea ka. Ke tla rerisana le molaoli oa lebatooa ho etsa *hore-le-hore*. Mobishopo o tla etsa *hore-le-hore*.”

<sup>104</sup> O itse, “Ho ngoliloe ho thoe.” O kile oa bea Adama oa Oona oa pele kamorao ho seo, ’me a tlola, ’me Satane a o senya. Empa o sitiloe ho senya Enoa, ho sa tsotellehe seo a se entseng. Hakaale, hofihlela a . . .

<sup>105</sup> Molimo o boletse, “Enoa ke Mora oa Ka ea ratoang. Mo utloeng. Sohle, Ke Mo neha sohle. Lōna, Mo utloeng.” Ba ne ba le Bang. Bao e ne e le ntho e le ’Ngoe. Molimo o phetse ka ho Eéna, hoo ho Mo etsa Molimo, Emmanuel, holim’ a lefatše. E ne e le Konyana e phethehileng, oh, Mosebetsi o phethehileng o tsoileng-matsoho oa topollo. Ho khahlile Molimo, mohlang oo, joaloka Michelangelo, A susumetsoa hakaale ke bophelo ba Hae. Re fumana ho . . .

<sup>106</sup> Mona fatše ke ngotse Mangolo. Mareka 9:7, ha u batla ho le bala. Mohla . . . Holim’ a Thaba Phetolelo. Mohla A leng holim’ a Thaba Phetolelo mono, re fihlela mono ho hlahile Moshe, ho boetse ha hlahila Elia.

<sup>107</sup> ’Me eaba, ntho ea pele le a tseba, moapostola Petrose a susumetsoa hakaale, a ba a re, “Ha re haheng metlotloane e merarō mona. Re tla bopa mekhatlo e merarō ka sena. Re tla thea mekha e merarō ea bolumeli: o mong oa Moshe, o mong oa Elia, le o mong oa Hao.”

<sup>108</sup> Eare a sa bua, puo ea tsoa lerung leo. Ea re, “Enoa ke Mora oa Ka ea ratoang. Eo Ke khahlisoang ke Eéna, Ke tla Mo otlela lōna. Le Mo utloe. O tlil’o bua.”

<sup>109</sup> “Athe o hlabetsoe litlolo tsa rōna. A tetekoa ka baka la bokhopo ba rōna.” E ne e le Konyana, Konyana ea Molimo, Sehlabelo se phethehileng. Ha ho ea kileng a phela joaloka Eéna, ho tloha mohlang oo ha ho ea kileng a phela joaloka Eéna. E ne e le Mosebetsi o phethehileng o tsoileng-matsoho, ho nyallana le Lentsoe la Molimo ka tšoanelo.

<sup>110</sup> Molimo tšimolohong o ntšitse Lentsoe la Oona, karoloana ea sekhutlo *sena* sa nako, ea karolo *eane*, ea karolo *eane*.

<sup>111</sup> Ke hona moo batho ba thetsitsoeng hakaale 'me ba ferakane kajeno. Ba ntse ba leka ho haha holim'a ntho e etsahetseng lilemong tse mashome a mane, tse mashome a mahlano tse fetileng. Re a... Seo, seo se ne se filoe mongoaha oo.

<sup>112</sup> Moshe a ka be a thusitse ka'ng ho tla ka—ka molaetsa oa Henoke? Moshe a ka be a thusitse ka'ng ho tla ka—ka molaetsa oa Nohe? Jesu a ka be a thusitse ka'ng ho tla ka—ka molaetsa oa Moshe? Le a bona? 'Me Wesley a ka be a thusitse ka'ng ho tla molaetsa oa Luther? Pentekosta e ka be e thusitse ka'ng ho tla ka molaetsa oa Wesley? Le bona seo ke se bolelang? [Phutheho e re, "Amen."—Mohl.]

<sup>113</sup> Ntho eohle e baletsoe nako hantle mona Bibeleng, 'me re tlameha ho tseba mongoaha le hora, le se baletsoeng rōna. 'Me ke hona moo re sitoang kajeno. Re ntse re bala lintho tsohle kantle le Bibele. Lena ke letsatsi leo re tlamehang ho phela ho lona. Lena ke letsatsi leo Molimo o re behileng mona. Ha re shebeng kahar'a Lentsoe.

<sup>114</sup> Ba sitoa ho bona Jesu joalo; Bafarisi bao, le Basadusi, Maheroda. Mekhatlo e fapaneng ea letsatsi leo e ne e finahane hakaale, 'me e finahane ka phetheho e kaale, ho se fera ea ho phonyoha ho hang, ba hopotse joalo. Empa mohla A tileng, ruri Eéna... Keha A fapane le kamoo bao bohole ba ileng ba e nahana. E ne e le mothoana, Thaka le ikokobelitseng le hlahetseng sejelong, ka e... a hopoloa e le Ngoana bonyatsi, le lintho tsena tsohle joalo.

<sup>115</sup> Empa, koana, O fihla ka tšoanelo eo Lengolo le Mo tlalehileng a tla fihla. 'Me ba tsebile seo Moshe a se buileng, 'me Moshe o buile ka Eéna. O itse, "Be, holane le tsebile Moshe, le ka be le tsebile le 'Na. Moshe o buile ka 'Na." 'Me le joale ha ba e bona. Ba tšophahane hakaale meetlong ea bona, ba ba ba sitoa ho e bona. Empa, le a bona, O ne a sa tlela ho halimisa mekhatlo eo ea letsatsi leo. O ne a sa tlela ho halimisa borapeli ba seng.

<sup>116</sup> O tlie ho halimisa Ntate, 'me Ntate e ne e le Lentsoe. Amen. Joale ke ikutloa ke arubetsoa ke borapeli. O tlie ho halimisa Lentsoe la Ntate. Molimo o itse O tla fihla mono, 'me E ne e le eo, Mosebetsi o tsoileng-matsoho e leng tšebetso e khōlō ea liatla tsa Molimo. Oh, banna! E ne e le khalimiso ea Oona e phethahetseng. O halimisitse sohle seo—seo Molimo a buileng ka sona. O halimisitse seo Adama a se boletseng ka Eéna. O batla a halimisitse sohle seo baporofeta ba se boletseng, sohle seo bapatriareka ba se boletseng. Sohle seo A se boletseng, E ne e le phethahatso ea Lentsoe. Lipapiso tsohle li phethiloe ka ho Eéna. Yaa. O ile a fetoha Jehova oa Testamente e Ncha. E ne e le Jehova oa Testamente ea Khale. "Lentsoe mohlang oo," le neng le ahile Topallong ea Mollo, "le ne le bonahatsoe 'me la aha har'a rōna."

Jehova oa Testamente ea Khale a fetoha Jesu oa Testamente e Ncha. E ne e le khalimiso e phetehihileng ea Molimo.

<sup>117</sup> Oh, hola Kereke kajeno e ne e ka halimisa Kereke eo ea pele feela, mohla Moea o Halalelang o nong o tšoloha ka Letsatsi la Pentekosta! Hola Mokreste kajeno a ne a ka halimisa! Re seholpha sa manyalisoa, khahlano le seo ba neng ba le sona.

<sup>118</sup> Ke haotse, kajeno ha ke e tla. Ke shebile, ha ke theohela mona, pel'a Casa Grande e nyenyane ena, kapa tse ling tsa lituloana tsena mona, ka bona mono e—e polasi ea khothono, le lifuru tse fapaneng. Ba ne ba tlameha ho emisa lipompo mono, ho pompa metsi, ho tsoellisa ntho eo. Hobanenng? Ha se letsoalloa la mono. Ruri lekhale. Empa, sheba lekhala la khale, pula e ka hlokahala lilemo tse hlano 'me le tla phela. 'Me ha u sa nosetse ntho eo matsatsi a 'maloa, e tla shoa. Le a bona, ha se ea mantlha.

<sup>119</sup> Le rōna re joalo. Re tlameha ho tefisoa, le ho hlongoa litho tsa litonana ka kerekeng, le ho phathatsoa, le ho bitsoa *sena, sane*, kapa se *seng*.

<sup>120</sup> Be, Bakreste bao ba mesong ba ne ba le bothamaha. Ba sa tsotelle ho phathatsoa mokokotlo. Ba ne ba halimisa Jesu Kreste, hakaale, ba boletse ba lemohile bao... Ba sa bala 'me ba sa ruteha. Ba sa kena sekolo se phahameng, 'me ba sa hlomelloa ligarata tsa kholeshe. "Empa ba lemohile hobane ba tsamaile le Jesu." Ke seo ba se hlokang, Bakreste kajeno, ho lemoha hobane u tsamaile le Jesu. Ntho e teng ka uena, e fapaneng. Ke a tseba ha se... Ha se taba e tummeng ho e bua, empa ha re batlane le botumo. Bakreste ha ba batlane le ntho e itseng e bonojana.

<sup>121</sup> Khaitseli ea holileng kerekeng ea ka lilemong tse fetileng, o ne a tloaetse ho ema le ho bina sefela.

Na ke pepeloe Leholimōng ka moalo oa  
lipalesa tsa boiketlo,  
Athe ba bang ba loanne ho hapa moputso ba  
sesisa maoatle a mali?  
Che. Ho busa ke tšoanela ho loana.

<sup>122</sup> Ha u nahana u ka be u entse'ng holane oa ba mona 'me sohle se eme khahlano le Jesu Kreste, holane u phetse matsatsing a Hae. U ntse u phela mono, moena oa ka, khaitseli. Ke hantle. E sa ntse e le Lentsoe. Shebang ba Le hatikela joang kajeno. Shebang kamoo ba lekang ho Le hlophisa, le ho Le futsoella, le ntho eohle ka mokhoa oo, le lefatše. Tsoa tjaro. Emela—emela Jesu Kreste le Lentsoe la Hae. Ho se be letho le sitisang seo. Tiisetka Lona hantle.

<sup>123</sup> Joaloka mahlatsoa-ho-omile ea khale ea monna oa Mochaena, ba ne ba fihle mona Arizona le California, lilemong tse fetileng. A sa khone ho ngola lentsoe le le leng la Senyesemane. A batla a sa se tsebe. U isa liphahlo tsa hao ho eéna. Le tseba seo a se entseng? A ipoloketse likhechana tsa pampiri, ho sa ngoloa letho ho hang. A tabole sekhechana seo sa

pampiri a u nehe sekhechana se seng. Ha u khutla, sekhechana seo sa pampiri se tlameha ho nyallana le sekhechana sa hae sa pampiri, ho seng joalo ha u fumane liphahlo tsa hao. Hoo ho betere ho feta. U ka kopitsa lebitso, empa mono o ke ke oa mo qhekanyetsa, hoba sekhechana seo sa pampiri se tlameha ho nyallana le sekhechana sa pampiri ea hae hantle.

<sup>124</sup> Le Molimo o sebelitse selekane sa Oona joalo. Boiphihlelo ba rōna ha bo a tlameha ho nyallana le sehlomathiso sa mofuta, tšomo ea mofuta, mokha o itseng oa bolumeli, empa ke ho nyallana le Lentsoe la Molimo, Jesu Kreste. Hantle. Ha re etla ho Kreste, le Kreste o a re tseka. O Mo khekhhethile habeli, mane Kalvari. A nyolla mokhekheto o mong, ho o beha letsohong la Oona le letona, e ne e le 'mele. Moea, O tlide, ho romeloa koano ho etsa Monyaluoaa Hae. 'Me bona boiphihlelo bo kileng ba aha ka ho Kreste bo tlameha ho aha ka ho rōna.

<sup>125</sup> O ne a—O ne a phethehile ka botlalo hakaale ho fihlela A khahlisitse 'Metli, ho Mo susumetsa hakaale hofihlela A Mo otlide Kalvari. Oh, banna! Joale re Mo bona joalokaha Lengolo le boletse, mosebetsi oa Molimo o tsoileng-matsoho. "Re Mo bona a otliloe, a lauoe, a hlomolisitsoe ke Molimo." Ke oo mosebetsi oa sebele o tsoileng-matsoho. Joalokaha 'Angelo a otlide oa hae, ke sona se entseng . . .

<sup>126</sup> Holane A phela bophelo bo lōkileng feela, A batla a itšoanelaa le batho ba bang ba rerang evangeli ea bochaba kajeno, "E ne e le moporofeta." E ne e le moporofeta, empa E ne e le ea fetisang le moporofeta. E ne e le Molimo. E ne e le Emmanuel.

<sup>127</sup> 'Me joale se Mo entseng ka tšoanelo, ho 'na, e—e Mosebetsi o tsoileng-matsoho ho 'na le ho uena, ke hobane Molimo a Mo otlide. O Mo otlide Kalvari. Holane A se ke a otloa . . . Ho sa tsottelehe O tsositse bafu ba bangata hakae, O rerile ka matla a makae, seo bophelo ba Hae bo boholo bo bileng sona, maipolelo a Hae ebile afe, O kile a pakoa mono. O ne a khahloe hakaalo, Molimo ehlide, hofihlela E bile Monna a le mong feela ea kileng a ema holim'a lefatše eo Molimo o mo otletseng ba bang bohle. Mophethethi Eo a otleloa ba sa phethehang. Tlhaho eohle neng e oelee, ka Adama, e ne e lopolloe ka Jesu Kreste. Mosebetsi oa Molimo o tsoileng-matsoho o kile oa mamella teko. O e phethile joang? Ka Lentsoe. "Ho ngoliloe, 'Motho a ke ke a phela ka bohobe feela, empa ka Lentsoe le leng le le leng le tsoang molomong oa Molimo."

<sup>128</sup> Oh, motsoalle oa Mokreste, apara lihlomo tsohle tsa Molimo. Se emelle morao ka kakanyo ea mofuta ea sehlomathiso sa mofuta, kapa nthoana eo u e emelang. Apura lihlomo tsohle tsa Molimo ha u tloha ho ea loana le sera, joalokaha Morena oa rōna a entse. O supile kamoo Mokreste ea fokolang ka ho fetisia a ka fekisang Satane ka Lentsoe feela. O ne a ruile mekhahlelo ea matla, A ka be a otlide Satane ka mokhoa ofe a O batlileng, empa

ha A ka a sebelisa. O nkile Lentsoe feela a mo hlola ka Lona. "Ho ngoliloe. Ho ngoliloe." Hohle, "Ho ngoliloe." Ka hona O hlotse Satane ka Lentsoe la Molimo.

<sup>129</sup> Joale, e ne e le Mosebetsi o tsoileng-matsoho o phethehileng 'me oa otloa ke Molimo. E ne e le mohlala o mokakang! Ntho e kakang ea makoma! Le bua ka sekotoana sa Michelangelo sa—sa sefika seo mono, sa Moshe ea teiloeng moomong? Bibele e boletse, "Monna enoa o ile a hlomolisoa ho feta batho bohle. A hlomolisoa hakaale hofihlela A sa tšoane le mora motho. O ile a shapuoia. O ile a tetekoa. O ne a le mali. A hlobolisoa." A... Sohle se neng se ka etsoa. A itšoanelia feela le—feela le polokoehali ea lehloelie la Mali le masapo, tse tsamaeang 'moho. A bile a sa tšoane le ngoana motho, ha A hulanya ntho eo ho nyolohela Kalvari. Molimo oa Mo otlela rōna. Ke sona se Mo fetolang Mosebetsi o tsoileng-matsoho o phethehileng.

<sup>130</sup> Oh, ke Mo rata hakakang, ho tseba hobane O e etselitse 'na, ho tseba hobane O e etselitse uena. Ebe re—ebe re ka buseletsa hofe ho tšoanelang? Ha ho motho ea ka buseletsang se tšoanang le seo. Ha ho ea nang le tokelo ho buseletsa se tšoanang le sona. Re ne re timeletsoe ke tšepo. Re se na Molimo. Re se na mokhoa ofe oa topollo. E mong le e mong oa rōna a tsuetsoe ka bong, 'me re tlameha ho lefa moputso feela. Empa O tlide, Mophethehi eo, a phethehile hakaale a khahleha hakaale hoo Molimo o bileng oa Mo otlela 'na le uena.

<sup>131</sup> Joale, e ka ba lilemo tse likete tse peli, esale Molimo o ntse o leka ho Ikhepholela Monyalua oa mosebetsi o tsoileng-matsoho, o bitsoang Kereke. Ke hantle. Ebe Molimo o e sebetsa joang? O e sebetsa ka mokhoa oa Oona o sa fetoheng le ka mohla, Lentsoe. Molimo ha o fetole mokhoa oa Oona le ka mohla. Motho mang, u ka khona. U a fetoha. Ke a fetoha. Nako e a fetoha. Lefatše le a fetoha. Empa Molimo ha o fetoha, O phethehile. Ha O fetoha. 'Me kamoo O sebelitseng ntho lekhetlo la pele, O e sebetsa joalo ka linako tsohle.

<sup>132</sup> O pholositse motho khetlo le leng hobane a bakile. O tla boela a pholosa motho joalo hape. O folisitse motho hobane a bile le tumelo. O tla folisa ea hlahlamang holim'a motheeo oo. Ha O fetole tsela ea Oona le ka mohla, hobane, le a bona, O ikemetse 'me Ke Mohlollehi. Ke mohlokaphello, motlalahohle, motsebatsohle. Ke Molimo. 'Me ha O a tlameha ho kōpa bohlale ho e mong. Ha O a tlameha ho ema hofihlela O ithutile ho feta. Ha O hloke ligarata tse ncha. O phethehile. 'Me morero ofe, le ntho efe eo O e etsang pele, qeto ea Oona ea pele e lula e tšoana kamehla. E ke ke ea fetoloa le ka mohla. Oh, ke thabile hakakang!

<sup>133</sup> 'Me mohla O ne o bopa mosebetsi oa Oona oa pele o tsoileng-matsoho, Oa mo beha ka morao ho Lentsoe. Mohla O ne o bopa Mosebetsi oa Oona oa bobeli o tsoileng-matsoho, E ne e

le Lentsoe. Amen. E ne e le Lentsoe; e seng ka *moraō* ho Lentsoe. Empa, E ne e le Lentsoe. Molimo ha o fetole leano la Oona le ka mohla. Ke hantle seo O qalileng ho sebetsa kereke ea Oona ea pele ka sona, Lentsoe.

<sup>134</sup> Joale, Molimo, Lentsoe, tšimolohong O ne o lokolohile ho ba bang bohole, ntho e 'ngoe le e 'ngoe ese, bathong ba bang bohole. Joale, ha ke a ikemisetsa ho bua taba ena ho fapania. Molimo ke mokhetholl. Le tseba seo? Le bua ka ho kopanya lintho? Molimo ke mokhetholl. Ruri O joalo. O khetha batho ba Oona lefatšeng. O ile oa khetha Israele, sechaba sa Oona. O ntse o leka ho khetha kereke ea Oona ho lefatše, empa kereke e batla ho tsoelapele le lefatše. Empa batho ba Oona ba sa ntse ba khethuoe, ba khethetsoe ho Oona. Ke Mang? Lentsoe.

<sup>135</sup> Motho a ka kolobetsoa ke Moea o Halalelang joang, athe Moea o Halalelang o ngotse Lentsoe, 'me motho a kolobetsoe ke Moea o Halalelang a ntoo hana Lentsoe? Moea o Halalelang ka ho uena o ka hanela Lentsoe la Oona joang le hlometsoeng uena? Ha ke khone ho e utloisia. O tlameha ho lumellana le Lentsoe. 'Me ha moea oa hao o ahileng ka ho uena o sa omele lipallo tsohle tsa Molimo ka "amen," phoso e teng.

<sup>136</sup> Moena Fred Sothmann kapa motho ea itseng mona bosiung bona, o ile a qotsa, "Jesu Kreste oa maobane, kajeno, le kamehla." Ke Lentsoe. Seo, ehlile. O a tšoana kamehla, le a bona, 'me moea oa hao o tlameha ho omela seo ka "amen."

<sup>137</sup> "Oh, Eéna, O joalo ka mokhoa o itseng." Ka mokhoa o mong le o mong, Ke oa maobane, kajeno, le kamehla.

<sup>138</sup> Joale re lemoha Molimo o qala ho Mo etsetsa e—e Monyaluoia oa Kreste. Ka hona... 'Me Monyaluoia o tšoanelia ho etsoa setlama le Eéna le ka ho Eéna, hobane ke karolo ea Hae. Joale, Monyaluoia ke karolo ea Hae. Ke karolo ea Hae. Lentsoe la letsatsi leo, Monyaluoia o fetoha karolo ea Lentsoe leo, hoba ke Kreste. Joale, na le lumela seo? [Phutheho e re, "Amen."—Mohl.] Re tlameha ho ba ka ho Kreste. Ka ho Kreste, re tšoanelia re be ba Kreste, ka ho Kreste, karolo ea Kreste.

<sup>139</sup> Mosali ke'ng, ha a nka monna, kapa monna a nka mosali? Mosali eo o tlameha ho ba karolo ea hae. Ha ba sa le babeli. Ba bang.

<sup>140</sup> 'Me ha Molimo le Kreste ba eba bang, Ba ne ba le Bang. Hobia, Molimo e ne e le Lentsoe, 'me Lentsoe le ne le etsoe nama. Nama le Lentsoe ba eba Bang. 'Me kereke ha e fetoha Monyaluoia oa Kreste, Eona le Evangelia ba bang.

<sup>141</sup> U ka rialo joang, ke hona, "Matsatsi a mehlolo a fetile"? U ka rialo joang, ke hona, "Ha se Oa maobane, kajeno, le kamehla"? U rialo joang, "Lintho tsena li etselitsoe moapostola kapa morutuoia, kapa motho e mong letsatsing le leng," athe u karolo ea Hae?

<sup>142</sup> Athé, O itse, “Maholimō le lefatše li tla feta, ha e le Lentsoe la Ka le ke ke la hloleha.” Ho ka thoeng ka Tšenolo 22, hoba A qete ho ngola Buka? O boletse, “Ke pakela e mong le e mong ekareha a ekeletsa lentsoe le le leng, le ha a tlosa Lentsoe le le leng ho Eona, kabelo ea hae e tla tlosoa Bukeng ea Bophelo.”

<sup>143</sup> Re tla kena joang Leholimōng, le hona, ho re, “Be, ke lumela sena, empa ha ke lumele Sane”? U tlameha ho ba Lentsoe le tletseng, hoba u karolo ea Oona. Molimo o ntse o leka ho bopa Kereke ea Oona joalo kajeno, e seng ka sehlomathiso. ’Me ba ntse ba leka ho re qophella nthong eo, baheso. Le ka e bona e a tla. Mongolo o leboteng. Ho se ho se hokae re tla fetoha Kereke ea lefatše. ’Me kereke ka ’ngoe e tla tlameha ho oela kahar’ a ntho eo, kapa ho oeloa ke litlamorao. Be, na u ikemiselitse ho emela seo? U mpe u se leke ho e etsa kahobane u hopola e le ntho e lōketseng.

<sup>144</sup> U mpe u be le Kreste ka ho uena, hoba Lentsoe leo ke la Bosafeleng, ’me Lentsoe leo ke lona le tlang ho u tsosa hape. U fetoha karolo ea Lentsoe leo. O etsoa setlama le Lentsoe leo.

Kajeno, u re, “Ke Mokreste.”

<sup>145</sup> “U setho sa mokha oa bolumeli bofe?” Be, taba eo ha e amane le Bokreste ka letho.

<sup>146</sup> Ho itoketse ho ba le mekha ea malumeli. Ha ke khahlano le seo. Empa, le a bona, seo, ke seo batho ba leng... Batho ba bangata ba re ke heletsa mekha ea malumeli, ke a e raha. Ha ke etse joalo. Che, monghali. Mekha ea malumeli, e itoketse. Ho tšoana le ho sebetsa ka litumellano, kapa ntho efe e kang eo. Empa ha u khomarella, hobane u re, “Ke Mokreste hobane ke setho sa kereke ea *hore-le-hore*,” ha e bolele letho. U tlameha ho ba oa Kreste, ’me Kreste ke Lentsoe. ’Me khafetsa mekha eo ea malumeli e hole le Lentsoe joaloka Bochabela bo le hole le Bophirimela.

<sup>147</sup> U tlameha ho tiisetsa Lentsoe leo, ho ba Monyaluo. Haeba u le ka ho Monyaluo, u kahar’ a Lentsoe, ’me Lentsoe le ka ho uena. ’Me Lentsoe le halimisitseng Molimo ka Kreste, le halimisa oona Molimo oo ka uena. Amen. *Amen* e bolela “ho be joalo.” Ka hona, ho be joalo. Ke a lumela hore ke ’Nete. U tlameha ho etsoa setlama le Eéna.

<sup>148</sup> Joale, haeba ke tla ba Moamerika oa makoma-’nete, haeba ke tla ba moahi oa sebele oa sechaba sena, ke tlameha ho etsoa setlama le sona. Ke tlameha ho fetoha sohle seo se kileng sa ba sona, se lōkile kapa se le phoso. Ke tlameha ho ba sohle seo se leng sona, se lōkile kapa se le phoso; sohle seo se tlang ho ba sona, se lōkile kapa se le phoso. Ke tlameha ho etsoa setlama le sechaba sena, haeba ke tla ba Moamerika. Na ho joalo? Ka khanya ea sona kapa sekhabo sa eona, tokoloho kapa lelakabe, sohle seo se leng sona, ke tšoanelo ho ba mothei oa tsoelopele ea sona e sa shoeng. Ke tšoanelo ho ema sa ngatana-nngoe. Sohle

seo se leng sona, ke sona. Sohle seo se kileng sa ba sona, ke sona. Sohle seo se tlang ho ba sona, ke tšoanelo ho nka kabelo le sona. Ke hantle.

<sup>149</sup> E nahaneng metsotso 'maloa feela. Ka hona, ho ba seo, joaloka Moamerika. Ke tla le tlisetsa eona, le tle le kholisehe ho e bona ruri, ke sa koala.

<sup>150</sup> Ho ba Moamerika, ke tlameha ho etsoa setlama le sohle seo e kileng ea se etsa. Ka hona, ke tsorame Plymouth Rock, 'moho le—le baholoholo. Ke fihlile Plymouth Rock le Bajaki. Ke bile teng le bona mono. Ka kalla le Paul Revere, bosiu bo bong, ho lemosa sechaba sena likoluoa tsa eona. Ke ne ke tlamehile, haeba ke ne ke le Moamerika.

U re, "Oh, Moena Branham!"

<sup>151</sup> Bea butle motsotso. Bibebe e boletse, ho Baheberu khaolo ea 7, ho itsoe, "Levi ea amohetseng karolo ea leshome, o ntšitse karolo ea leshome, hobane o ne a le lethekeng la Abrahama mohla a köpanang le Melkisedeke," ntatemoholo-holo-holo, eaba o balloa hona. Mohla setloho-tloho-tloholoana sa hae se leng lethekeng la hae, mohla Abrahama a ntšitselitseng Melkisedeke karolo ea leshome, Molimo o e balile. Na O e balile? [Phutheho e re, "Amen."—Mohl.] Ke hantle.

<sup>152</sup> Sohle seo sechaba sena se leng sona, ke sona. Ke hantle. Ka hona, ke tsorame Plymouth Rock. Ka kalla le Paul Revere.

<sup>153</sup> Ka tšela Valley Forge, har'a nōka e hoammeng leqhoa eo 'moho le George Washington. Ka ba e mong oa masole ao a Maamerika a sa roolang lieta, ho hoanta khahlano le Maborithani. Ka hatsela maoto hoseng hoo, ka phuthela maoto a ka. Ke bone Washington a bitoha nahathote, a kolobile, ho fihla lethekeng la hae, ka baka la ho rapela bosiu tšekhe. Ke ne ke le teng ha e etsahala.

<sup>154</sup> Ka ema le Stonewall Jackson, mohla sera se leng seholo. Mohla mabotho a leboea a rometsoeng tlase mono, ba itse, "Mabotho ohle a robiloe a honyetse."

Ha thoe, "Ebe Jackson o kae?"

<sup>155</sup> Ha thoe, "O eme sa lerako la lejoe." Ka ema le eéna mono; mothoana, mothaka ea sekutoana, ea mahlo-maputsoa.

<sup>156</sup> Ba 'motsitse khetlo le leng, "U tiisetsa joang athe sera se seholo hakaale?"

<sup>157</sup> Monna ea ithobileng haholo, a raha ka seeta joalo, ka tsela eo, ha thoe, "Nke ke ka hlola ke isa metsi molomong oa ka, pele ke leboha Molimo o Matlaohle." Ka ema le eéna likholisehong tsa hae. Ka ema le Stonewall Jackson. Ke hantle.

<sup>158</sup> Ka ema Boston Tea Party. Ka thusa ho lahlela Tee ea Borithani ka kantle leoatleng. Ke ne ke tlamehile, ho ba Moamerika. E, monghali. E, monghali. Ka tekena Phatlatlatso

ea Boipuso, le Thomas Jefferson. Ka letsa Liberty Bell, ka la 4 Phupu, 1776.

<sup>159</sup> Ke etsoa setlama sekhobong sa eona sa ntoa ea thari, mohla moena a tsohelang moena matla, le ntate a tsohela mora matla. Ke tlameha ho etsoa setlama sekhobong sa eona, joalokaha ke etsoa setlama tlotlisong ea eona. Ke hantle haholo.

<sup>160</sup> Ke ema Wake Island mohla masole ao ohle a lahleheloaing ke maphelo. Ke ba bone ba e etsa. Ke ba bone ba hapa Wake Island. Ke thusitse ho phahamisa folaga Guam. Ruri.

<sup>161</sup> Sohle seo ebileng sona, le sohle seo e kileng ea se etsa, sohle seo e leng sona joale, ke ittaleha ke le motlotlo ho ipitsa karolo ea sona, hoba ke thabela ho ba Moamerika. Ha le joalo na? [Phutheho e re, "Amen."—Mohl.]

<sup>162</sup> Ho ba Mokreste, ke tšoanelia ho ba joalo. Alleluia! E, monghali. Haeba ke Mokreste, ke rerile Evangeli ka lemosa likahlolo tse tlang, le Nohe. E, monghali. Ke bile karolo ea eona morao mane, ka mono. Ka ba karolo ea moruo oa Molimo.

<sup>163</sup> Ka ema le Moshe sehlahleng se tukang. Ka lelekua Egepeta le Moshe. Ka kena palehong ea nahathote, ka ema le eéna sehlahleng se tukang. Ke utloile puo ea Oona. Ke bone khanya ea Oona. Ka bona Topallo ea Mollo motšeо sehlahleng se tukang seo, e qoqa le Moshe.

<sup>164</sup> Ka ema le eéna Leoatle le Lefubelu ha le phetloa. Ke bone Topallo ea Mollo e lula Thaba Sinai. Ke jele manna nahathote le ho noa lefikeng le teiloeng. Alleluia! (Ha ke ikutloe mashome a mahlano a metso e mehlano hona joale.) Amen. E, monghali. Ke ja manna nahathote, le bana ba Baheberu morao mono nahathote. 'Me ke noeles ho lona lefika le teiloeng.

<sup>165</sup> Ka ema le Joshua hoseng mohla a hlahlobang marako a Jeriko, le ho bona Monna ea emeng. A tsomula sabole ea hae a ea khahlana le Eéna. O itse, "Na U oa rōna. Na U oa sera sa rōna?"

<sup>166</sup> O itse, "Ke Molaoli oa makhotla a Morena." Ke bone Joshua a lahlela sabole ea hae fatše. Ka khumama le Joshua ha ke inama pel'a Hae, Molaoli oa Morena oa makhotla a Hae. Ka bona marako a Jeriko a heleha, ha ho letsoa terompeta.

<sup>167</sup> Ka bona Joshua, ha thoe, "Letsatsi, ema tsi. 'Me, khoeli, ema holim'a Ajalone. U sa suthe." Ke bone letsatsi le ema, le khoeli e sa time ngoeli ea eona. Ke bone seo sohle se etsahala.

<sup>168</sup> Ka ema le Daniele lemeneng la litau; le bana ba Baheberu seboping sa mollo.

<sup>169</sup> Ka ema le Elia, kantle mane mohla a furaletsoeng ke lefatše lohle, le Akabe le bo-Jesebele bohole ba bona ba meriri e kutiloeng le lintho tsa letsatsi leo, liferefe tsa bona le liphofshoana, sohle se neng se hapile kereke. Ka ema le Elia, ka tlaleha molaetsa o hloekile o iphotlile, holim'a Lentsoe la Molimo. Alleluia! Ka ema

le eéna Thaba Karmele mohla a emeng a le mong kantle mono.  
Ka 'mona a theola mollo leholimõng ka thapelo.

Ka ema le Davida mohla a bolaileng Goliathe. Khanya ho Molimo!

<sup>170</sup> Be, ha ke le Mokreste, ke entsoe setlama le seo sohle. Ke tlameha ho ba karolo ea eona. E, monghali.

Ka porofeta le Esaia letsatsing la hae.

<sup>171</sup> Ka ema le Johanne Jordane mohla a bonang leeba le theoha le lula holim'a Hae. Ka ema le Johanne Jordane.

<sup>172</sup> Ka 'mona A folisa bakuli; ho tsosa Lazaro; ho tsosetsa morali oa Jairuse bophelong, hoba a shoe. Ke bone seo.

<sup>173</sup> Ke etsoa setlama le Eéna lefung la Hae. Ke shoele le Eéna mohla A shoang Kalvari, ka tsoha hape hoseng Paseka le Eéna, ka matla a tsoho ea Hae. Ke paki ea eona bosiung bona. Ke shoele le Eéna Kalvari, ho tsosoa le Eéna ka Paseka. Alleluia! Ho ba karolo ea Hae, ke tlameha ho etsoa setlama le Eéna. Ka etsoa setlama le Eéna lefung la Hae. Ka etsoa setlama le Eéna mahlomoleng a Hae. Ka etsoa setlama le Eéna mohla mekha ea malumeli e Mo furaletseng. Ka etsoa setlama le Eéna mohla ba Mo ntšang tempeleng, mohla ba lekileng ho lihela, ho Mo lahla. Ke bile le Eéna mono. Ka ba le Eéna lefung la Hae, ho tsosoa le Eéna tshong.

<sup>174</sup> Ke bile le ba lekholo le mashome a mabeli mohla ba hloellang phaposi e kaholimõ. E, monghali. Ke bone moea oo o fokang ka matla o tsoang Leholimõng. Ke buile ka maleme le batlotsuoa ka Letsatsi la Pentekosta. Alleluia! Ke ne ke le teng mono hobane ke entsoe setlama le Eéna. Khanya ho Molimo! Ke hantle. Ka rera le Petrose, ho Liketso 2. Oh, ke rerile le eéna mono.

<sup>175</sup> Ke rerile le Pauluse holim'a Mars Hill, ka pel'a moseholli. E, monghali. Ke ne ke tlamehile.

<sup>176</sup> Ka ema le Johanne Sehlekehlekeng sa Patmose. Ke bone pono ea ho Khutla ha Hae. Ke joalo. Ke—ke bone Luther. Ka ema le eéna mehleng ea hlabollo.

Ka ema le Wesley.

<sup>177</sup> 'Me joale ke mona Yuma, Arizona. Alleluia! Ke etsoa setlama bosiung bona, mona Stardust Motel ona, 'moho le sehlopha sa batho ba lumelang ntho e tšoanang. "Me joale re lutse 'moho libakeng tsa Maholimõ ka ho Kreste Jesu." Alleluia! Ke shebeletse ho Khutla ha Hae ka khanya, le leng la matsatsi ana. Ho etsoa setlama le Eéna!

Ho phela, O nthatile; lefung, A mpholosa;  
Kepelong, O isitse libe tsa ka hole;  
Tshong, O lokafalitse kamehla;  
Tsatsi le leng O tla khutla, oho letsatsi le  
khanyang!

<sup>178</sup> Hona joale ke entsoe setlama kolobetsong ea Moea o Halalelang; e seng ntho e 'ngoe kantle mona seterateng, ntho e itseng ea lilemo tse mashome a mane tse fetileng. Ke e tšoere hona joale, khanya le matla a Molimo, a tšoarelo ea libe. Ke 'Mona a folisa bakuli, ho tutubolla mahlo a lifofu, ho Mo bona a bolela lintho esale pele, ho bala lipelō tsa batho. Ke etsoa setlama le Eéna bosebeletsing ba Hae letsatsing lena. Khanya ho Molimo! Ke etsoa setlama le Eéna, bakeng sa tokoloho ea matsatsi ana a bofelo. Ke tšepa ke le karolo ea Monyaluo a moholo ea tlang ho hlaha le leng la matsatsi ana.

<sup>179</sup> Ho sa tsotelehe seo lefatše le ka se bolelang, ho re bitsolla "mahlanya, bahabehi, kapa bo-Belsebule, kapa bakhelohi," sohle seo ba batlang ho ba sona. Ke ntse ke batla ho etsoa setlama le sehlopha seo. Ke sa ntse ke le mono. Ke itulela mono. Ke tsoaletsoe mono. Ke batla ho lula mono. Ke tla lula mono kamehla, hoba Molimo o mpahile mono. Ke mono. Ke tlohetse kereke ea ka, ho tla iketsa setlama le mphi ea bahalaleli-bathetheli. Ke e mong oa bona. Ke entsoe setlama le bona.

Ba re, "Billy, u lahlehetsoe ke kelello ea hao."

<sup>180</sup> Ekaba ke joalo, empa ke fumane mohopolo oa Kreste. Ke fumane Lentsoe la Hae, ho fumana Sefahleho sa Hae, ho fumana hobane Ke oa maobane, kajeno, le kamehla!... ho sa tsotelehe seo mang a se nahanang ka eona. Enoa ke 'na. Ke 'na ea tšoanelang ho iketsa setlama. Ke entsoe setlama le Eéna, ka Lentsoe la Molimo. O boletse, "Mehlolo e tla tsamaea le ba lumelang ke eona ena." Ke thabile ha ke entsoe setlama nthong eo. E, monghali.

<sup>181</sup> Le a tseba, seletsi sa mehleng sa fiolo, khetlo le leng. Le utloile pale. Ba ne ba bolokile fiolo ea khale 'me ba ea e fantisa. Ba batlile ho e rekisa, 'me ho se ea batlang ho e reka. Ba itse, "Ke mang ea otlang dolara tafoleng?" Ke mang ea otlang dolara le halofo tafoleng?" Ho feleng, "E-ea hang, e-ea habeli, dolara le halofo."

<sup>182</sup> Ho feleng ha qatsoha leqheku le hlooho-putsoa mokhuping. Le tseba pale. La e qotsa, la re, "Mphe eona koano." A tšasa tšotsoana holim'a seqha sa hae, a e hohla makhetlo a 'maloa. Batho ba qala ba lla. Likeleli tsa phorosela lifahlehong tsa bona, joalo.

<sup>183</sup> 'Me ha ba entse, rafantisi a e phahamisa, ho re, "Ea otlang tafole ke mang," ho re, "sekete sa didolara, likete tse peli, likete tse hlano?"

<sup>184</sup> Phapang e ne e le efe? Setsebi, se neng se e tseba, se e hahileng, o bokhoni ho notlolla se neng se loheletsoe ka ho eona.

<sup>185</sup> 'Me ha feela re leka ho ntša likereke tsa rōna sehlomathisong le mekheng ea malumeli, re ke ke ra e khona le ka mohla. Le lumelle Sehahi sa Sehlooho sa ngoana motho, Se entseng motho ka setšoantšo sa Sona, Se ntseng se Ikahela Monyaluo a hona

hoo, lumella mosehlo oa seqha sa Hae sa Moea o Halalelang o hohle Lentsoe lena pelōng ea hao hang, 'me e tla ba mohlala oa rōna o fetisang ka bokhabane. Ho sa tsottelehe bongata ba likereke tse khōlō tseo u li kenang, le bongata ba mabitso bukeng, e tla sebeletsa Jesu Kreste ho feta likereke tsohle, le mekha ea malumeli, le lihlomathiso, le likereke tsa lefatše, le mekhatlo, lefatšeng lohle.

<sup>186</sup> O ntse a bopa Monyaluo. E, monghali. Hona joale O ntse a qhetsola liphatsa, ho rema lefatše. Oh, ho ingolisa-kerekeng, le lihlomathiso, le mekha ea malumeli, le litšomo, li tlameha ho pongoa tsohle Kerekeng; menahano ea bona e tsitsipaneng, monyemo oa bona, lithuto tsa bona le lintho. Khutlang le lumelle Setsebi se thonake seqha. Le lumelle Setsebi ho le tšoara matsohong a Sona, ho hohla Lentsoe, ho re, "Jesu Kreste oa maobane, kajeno, le kamehla."

<sup>187</sup> Ho re, "Amen, Morena. Nketse, mpope, nketse, Morena, seo ke tlamehang ho ba sona." Ho tla hlaha ntho e fapaneng.

<sup>188</sup> Ke moo, "Ha Nka nyolloa lefatšeng, Ke tla hulela batho bohle ho 'Na." E, monghali.

<sup>189</sup> O ntse a u rema hona joale, ho u betlela Lentsoe la Hae le inotši, ho khethula lihlomathiso tsohle le litšomo le ntho eohle, ho uena, ho leka ho khutlela morao ho Monyaluo oa Mora, mosebetsi o mong o tsoileng-matsoho, karolo ea Lentsoe! Lentsoe!

<sup>190</sup> Jesu o ne a ka sitoa ho tlatsa sebaka. Le sa hopola mohla ba balileng buka letsatsing leo? O balile karolo ea seporofeto feela, e 'ngoe ea sieloa letsatsila bofelo. Re tlameha ho nka karolo eo.

<sup>191</sup> Ka hona, le a bona, O khethutse, o batla ho khethula Kereke, joalokaha A entse ka Mora, joalokaha A entse ka Monyaluo le Monyali. Ho ba Monyaluo oa Hae, u tšoanelo ho ba karolo ea Hae. E seng karolo ea sehlomathiso, e seng karolo ea kereke, e seng karolo ea mokha oa bolumeli, empa karolo ea Hae. Ho rengoa sebopehong sefe le mofuta ofe, ho ke ke ha sebetsa. U tlameha ho rengoa Lentsoeng. Lefatše le pongoe ho uena, le ho tlohellia Lentsoe le inotši ho phela ka ho uena.

<sup>192</sup> 'Metli e moholo o itšepisitse ka uena, ho ikemisetsa ho ema le ho ikokobeletsa ho boptjoa ka setšoano sa tlhoko ea Oona eo Lentsoe la Oona le e hlakang. "Matsatsing a qetelo Ke tla tšela nama eohle ka Moea oa Ka. Ho be ho porofete bara ba lōna le barali." Kreste ke Mosebetsi o tsoileng-matsoho o supiloeng oa Lentsoe le entsoeng nama. U koptjoa ho etsoa setlama ka ho Eéna, ka lona Lentsoe leo, ho ba mosebetsi o tsoileng-matsoho oa Monyaluo.

<sup>193</sup> Joale, baena, Molimo o ne o e-na le mosebetsi o tsoileng-matsoho mohlang oo, ho hlahisetsoa lefatše, joale kajeno O batla mosebetsi o tsoileng-matsoho. Na u ikemiselitse? Na u itōkisitse, motsoalle oa ka oa Mokreste? Na u tiile ruri bophelo ba hao

bo halimisa Kreste hakaale, ho sa tsotelle seo lefatše le se bolelang. Ba re, "U lahlehetsoe ke kelello. U a hlanya. U ile oa tloha ho ea iteanya le mphi eo ea bahalaleli-bathethethehi." Le se ke la tsotella seo.

<sup>194</sup> Haeba u sa bolokeha kannete, le kahar'a 'Mele oo, le Lentsoe la Molimo le ahile ka ho uena le Ikhalmisa, 'me Bophelo ba Kreste bo halima ka uena; moena, khaitseli, u se ke oa e hakanya feela. Ha ke tsotelle seo u leng sona, u tšoere maiphihlelo a mofuta ofe, lumella Lentsoe leo ho halimisoa ka uena letsatsi ka leng, hobane Molimo, matsatsing ana a qetelo, o ntse a nka Monyaluoaa oa Mora oa Hae, Jesu Kreste.

A re inamiseng lihlooho tsa rōna.

<sup>195</sup> Ntata rōna ea ratehang oa Leholumō, mokhoa o khohlahetseng hakaale pontseng ea batho ba bahlalefi. Thuto ea ka e suffi-... e a haella, Morena. Ke rapela Moea o moholo o Halalelang ho tebisetsa mantsoe ana lipelōng tsa batho, ba tle ba bone seo ke neng ke se bolela, haeba ba fela ba sa utloisia mokhoa oa ka o khabelang lintho, Morena. Empa, pelōng ea ka, ke—ke bona seo U—seo U ntseng u leka ho se etsa.

<sup>196</sup> Ke a lumela, Ntate, Monyaluoaa o tšoanelaa e be karolo ea Monyali. O tšoanelaa ho tšoana le Monyali, hoba ke karolo ea Hae. A ke ke a khona le ka mohla, le ka mohla e be Monyaluoaa oa Hae pele e-ba karolo ea Hae. 'Me eo ke karolo ea Lentsoe, kajeno, e reng Ke oa maobane, kajeno, le kamehla.

<sup>197</sup> Hlaku ea koro e kile ea phela lefatšeng, ea oela mobung, ea ba ea tsosoa ka setšoano sa tlhaku e keneng mobung. 'Me, Morena, ka Letsatsi la Pentekosta ho hlahile Kereke e khōlō. Ho hlahile thollo e 'ngoe ea koro, ho etsoa Monyali le Monyaluoaa oa letsatsi la qetelo.

<sup>198</sup> Re fumana, e oetse kahare, bakeng sa Hae, lilemo tse sekete. Ho tloha lekhotleng la Nicaea, ea ithoballa ea bola mobung.

<sup>199</sup> Banyefoli ba ngotse buka, *Molimo O Khutsitseng*, "O nyemotsang bana ba shoang, ba bolaoa ke litau, ba chesoa. Le liloani tsa bolaela Bakreste tumelo, ba chesoa lithupeng." Hola monna eo a ne a aheletsoe kutloisiso ea moea!

<sup>200</sup> Koro eo e tlameha ho bola mobung, empa ea boela ea bitoha, e sa nka setšoano sa e keneng mobung. Ea theoha ka setšoano sa thollo ea koro, empa, mohla e hlahileng, e metse maqoba a 'maloa, a tšoanang le a koro e ncha e melang.

<sup>201</sup> Qetellong ea haola ea mela, ho qala ho Luther ho isa ho Zwingli, le ho theoha, 'me qetellong ea fihla ho litšohlo. Ea iphetola matsatsing a Wesley. Éa ipopa joaloka koro ho feta-feta, le ho feta-feta kamoo e ileng ea tšoana le maqoba. E khutlela ho eona hape.

<sup>202</sup> Re ntoo fumana, e hlaha hape, e le thollo, e tšoana le ea makhonthe. 'Me ha u ka theoha feela oa lula oa phetla

lekhapetla, u tla fumana. Thollo eo ea pele ea koro ha e-na thollo ka ho eona, ho hang. Ke lekhapetla, lehlaku. Morena, tsoselotso e khōlō ea Pentekosta e haotseng, e ne e tlamehile joalo, Morena, ho sireletska Koro mohla e fihlileng. E ne e sa tl'o fumana sebaka ho ea teng.

<sup>203</sup> Joale, Ntate, re a tseba lintho tsohle re li nka ka tlhaho, hoba U entse tlhaho. U lopolotse lefatše: kamoo U le kolobelitseng, matsatsing a Nohe, ka morao ho theron ea hae; Ua rothetsa Mali a Mora lefatšeng, ho Ikhalaletska lōna; 'me mongoaheng o moholo o tlang ho tla, nchafatsong, U tla le chesa ka mollo, ho chesa lintho tsohle tsa selefatše. Joalokaha U sebetsa Mokreste, U mo pholosa: ho mo kolobetsa; ho mo halaletsa; le ho hlanamisa lefatše ho le tlosa ho eéna, le ho mo tseka lekhatheng leo e le oa Hao, ka ho tselo Moea o Halalelang ka ho eéna.

<sup>204</sup> Re tseba koro ena e haotse khatong e tšoanang. Tlhaho e 'ngoe le e 'ngoe e sebetsa ka ho tšoana. Joale, Morena, hona joale ha re bona lekhapetla le ikhula ho Thollo, le inkela lefatše, oho Molimo, etsa hore lithollo tsena li tle li . . . E—e lekhapetla le tšoanelo ho ikhula, thollo e tle e kene Pontšeng ea Mora. Ke utloa sekele e tlang e hōba, Morena. Ho se ho se hokae. 'Me keche e khōlō e tla hloibilela Monyaluo oa Hae khanyeng, Pontšeng ea Molimo.

<sup>205</sup> Ke a rapela, Ntate, hore U hlohonolofatse e mong le e mong oa rōna. Re hopole, Morena, ona ke monyetla oa rōna. Re ka tšoha re sa fumane o mong hosane. Kajeno ke monyetla oa rōna. "Kajeno, ka morao ho nako e kaalo, ha le utloa Puo ea Hae, le se ke la thatafatsa pelō tsa lōna." Morena Molimo, ha ke tsebe batho bana. E mong ha a le teng mona, a haelloa ke sena, ba abele ho amohela bottlalo ba Molimo bosius bona, le ho tlatsoa ke Moea o Halalelang. Aba sena, Ntate.

<sup>206</sup> Joale ka lihlooho tsa rōna tse inamisitsoeng, lipelō tsa rōna li inamisitsoe, hape. Metsoalle, le ntšoarele kamoo ke khabelang molaetsa oa ka. Ke—ke rapela Molimo ho le bontša seo ke neng ke se bolela feela. Joale, haeba . . . Ha ke batle motho ea shebang. Tsoang le sa inamisitse lihlooho tsa lōna. Ha ke. U ka bang mang, haeba u sa kholiseha hoba bophelo ba hao . . .

<sup>207</sup> Joale, le a bona, khato e 'ngoe le e 'ngoe ea tseo, li entse'ng? Li fetohile mokhatlo. Eaba O etsa'ng? Moea o ile oa falla, ho fetela ho e 'ngoe. Hang ha Luther a hlophisa; O tlohile oa kena hantle ho Wesley. Wesley a hlophisa; Oa tloha oa kena hantle ho Pentekosta. Pentekosta ea hlophisa; O fetela kae? Joaloka Topallo ea Mollo feela, ha o phetse ho 'na o tsamaea.

<sup>208</sup> 'Me batho ba bang ba ka re, "Ke Mopentekosta." Hoo ke botle. "Ke Lutheran." Hoo ho itōketse. Ha ho letho khahlano le seo.

<sup>209</sup> Empa, motsoalle, motsoalle, Koro e sa ntse e haola. Re tsoa fumana e 'ngoe ea litsolelso tse khōlōhali. E—e hutse

halelele ho fetisisa. Nalane a supa tsoseletso e batla e nka lilemo tse tharō feela. Ena e hutse lilemo tse leshome le metso e mehlano, kapa ho feta, matšolo a maholo a pholiso, empa joale e pholile. Shebang! Tsoseletso e 'ngoe le e 'ngoe kamehla e hlahisa mokhatlo o e salang morao. Hobaneng ena e sa etsa joalo? Sehlotšoana sa baena se ne se qale, holimō mona nqa e 'ngoe, se bitsoang Pula ea Hoetla, ha ba tsoa tema ea letho; ea hohlomela hantle. Hobaneng? Ke mongoaha oa Koro, motsoalle. Ke Koro. Bosebeletsi bo teng lefatšeng bo itšoanelang le bo keneng mobung motšeо koana tšimolohong, boiphihlelo ba makhonthe ba pentekosta.

<sup>210</sup> Likereke li ntse li hlophisoa. 'Me e 'ngoe e ntse e leka ho haha haholo ho feta e 'ngoe, le ho itholla litho tse ngata le lintho, mekhatlo, butle-butle. Re a e bona. Ke mopentekosta. Re e bona e ikhula. Empa ke'ng? E tlameha ho etsa seo, ka hona e—e le hore Mora a finyelle Thollo. Hola ea se ke ea fihla mono, pele, hola lekhapetla le sa e teela hare, e ka be e sa fumana moo e ka eang teng. Molimo o le entse lekhapetla, le a bona, joaloka tlhaku, joaloka koro, joaloka ntho efe e tsoang leloaleng. Joale, le a bona, ha ho eso qale mokhatlo ka morao ho sena. Hobaneng? Nako ea o mong e felile. Re qetellong.

<sup>211</sup> 'Me ha u se hantle moo u tšoanetseng ho ba teng, 'me u ka re, "Moena Branham, haeba Molimo o utloile thapelo ea hao ea bakuli, 'me ke utloile seo Morena a se entseng ho arabela thapelo." 'Me u utloetse ka batho ba bang lefatšeng kajeno, ba rapelang. U re, "Ke... Na u tla nthapella, ho fuoa boiphihlelo boo, Moena Branham? Nka tšoha ke sa u bone hape." Nka tšoha ke sa le bone hape. "Empa ho nthapella ho ba teng mono. Ha ke ikutloe ke tla ba teng mono joale. Empa ke rata ha u ka nthapella, ke tle ke khone."

<sup>212</sup> Joale, hlooho ka 'ngoe e inamisitsoe. Phamamisa letsoho la hao, na u tla etsa? Morena a u hlohonolofatse, u hlohonolofatšoe, le uena. Molimo a u hlohonolofatse. Sehlopheng sena sa batho, ke a kholoa, mashome a mahlano, mohlomong, kapa ho ne ho phahame matsoho a mashome a supileng a metso e mehlano.

<sup>213</sup> Joale, Jesu ea Ratehang, U moahloli. Rōna re bareri feela. Ke a rapela, Molimo o Ratehang. 'Me—'me haekaba ke bone mohau mahlong a Hao, araba thapelo ea ka. U bone letsoho ka leng le phahameng. U tseba se neng se pelōng tsa bona. Re a lumela ba reretsoe Bophelong. 'Me Satane, joaloka matsatsing a Adama, o ntse a leka ho thibela mosebetsi oo o tsoileng-matsoho ho hlahella. E ke e thibeloe bosiusing bona. Mali a Jesu Kreste a e khine, ba ke ba tsoe e be mosebetsi o tsoileng-matsoho ho Molimo. Aba sena, Ntate.

<sup>214</sup> Ba ke ba suptjoe Lentsoeng la Kreste. O boletse, "Ekare motho ha a sa tsoaloe labobeli..." Ba fuoe boiphihlelo boo ba tsoalo ea bobeli. Ba fuoe kolobetso ea Moea o Halalelang,

hlanamiso ea lintho tsohle tsa lefatše. Ha ba sa le batla, Morena. Ba hloekise lefatše leo, le ho ba hloma e be mosebetsi o tsoileng-matsoho ka pel'a batho. Aba sena, Morena, hore U tle u thabe mongoaheng ona oa nako-ea-tšimo matsatsing a qetelo mona, ho lhahisa mosebetsi oa Hao o tsoileng-matsoho oa banna bana le basali, bashanyana le banana, ba phahamisitseng letsoho la bona. Aba sena, Morena.

<sup>215</sup> Hlohonolofatsa tsoselotso ena e tsoellang motseng. Oho Molimo, ke rapela monna le mosali e mong le e mong, ba leng haufi, ba tle ba etele tsoselotso eo. 'Me e mong le e mong oa bona a tlatsoe ka Moea o Halalelang,' me tsoselotso ea mehla-ea-khale e haole motsaneng ona mona, ho be ho tle batho ba tsoa hohle. Aba sena, Morena. Re fe lintho tsena, Ntate, hoba re li kōpa ka Lebitso la Jesu. Amen.

<sup>216</sup> Ke a Mo rata. Ke a Mo rata. Le a Mo rata na? [Phutheho e re, "Amen."—Mohl.] Le a tseba, Pauluse o boletse, "Ekareha ke bina, ke bina ka Moea." Ke a ipotsa. Ke hole haholo le ho ba sebini. Empa ke a ipotsa, 'moho, haeba re ke ke ra qala sefela seo, *Ke A Mo Rata*. Na u ka re fa lehlaso, khaitsei? "Hoba A nthatile pele." Le se utloile na? Ba se tsebang ba bakae? Ha re a lōna... Ke se seng sa lifela tsa ka tsa khale. Ke rata ho se bina. Ke hantle.

<sup>217</sup> Ha a re inamiseng lihlooho tsa rōna re koale mahlo a rōna, re bine joale, *Ke A Mo Rata*.

Ke a Mo rata, ke a Mo rata  
Hoba A nthatile pele  
Le ho lefella toloko ea ka  
Fateng sa Kalvari.

<sup>218</sup> Ha re se bineleng ka marameng. [Moena Branham o qala a binela *Ke A Mo Rata* ka marameng—Mohl.] Tsatsi le leng meokoli e tla haola sepakapakeng. Terompeta e tla lla. Ba shoetseng ho Kreste ba tla nyoloha. Oh, re tla E lakatsa hakakang mohlang oo!

Le ho lefella poloko ea ka  
Mane Kalvari.

<sup>219</sup> Ke hona moo A ileng a fetoha Mosebetsi o tsoileng-matsoho ho rōna. [Moena Branham o qala a binela *Ke A Mo Rata* ka marameng—Mohl.]

<sup>220</sup> Le hopole feela, mesebetsi eohle e tsoileng-matsoho, pele e ka fehoa holong ea bahale, e tlameha ho fetisoa holong ea eona ea basomi, pele. Basomi ba tlameha ho bona haeba ba ka e nyatsa. Empa ha o ka mamella basomi, ke mohla o fallisetsoang holong ea bahale. Mora Molimo o fetile basomi ba mokhatlo o mong le o mong, mokha oa bolumeli, esitile le Pilato a itse, "Ha ke fihlele molato ho eéna." Judase o itse, "Ke ekile Mali a se nang molato."

<sup>221</sup> Eaba Molimo o a Mo tsosa, 'me kajeno O fehiloe holong e khōlō ea bahale, letsohong le letona la Molimo, ke 'muelli. Na ha u batle ho kōpana le Eéna mono? Na ha u batle ho ba karolo ea seo? U ka ba eona. U mengoa ho ba eona. Re sa bina sefela sena, hobaneng u sa lōkise litaba le Eéna feela joale.

...nthatile pele  
Le ho lefella poloko ea ka  
Fateng sa Kalvari.

<sup>222</sup> Re sa se bina hape, ke batla u tsukutlane ka matsoho le motho ea ka nqane ho tafole. Ho re, "Molimo a u hlohonolofatse, motsoalle oa Mokreste. Molimo a u hlohonolofatse. Nthapelle." E mong le e mong oa lōna a etse seo joale, re sa se bina hape.

Ke rata . . .

Nthapelle. Nthapelle.

...Mo rata  
Hoba A . . .

<sup>223</sup> Ke hantle, tsukutlang matsoho, ho re, "Nthapelle." Lōna bohole le nthapelle. Ke batla ho ba teng mono, habohloko.

Le ho lefella poloko ea ka  
Fateng sa Kalvari.

<sup>224</sup> Joale a re inamiseng lilooho tsa rōna re koale mahlo a rōna, re phahamise matsoho a rōna 'me re Mo binele sona joale.

Ke . . . (oho Molimo), ke a Mo rata  
Hoba A nthatile pele  
Le ho lefella poloko ea ka  
Fateng sa Kalvari.

Talimang Mosebetsi oa lōna o tsoileng-matsoho o leketlileng mono.

<sup>225</sup> 'Metli e moholo, Molimo o moholo O entseng motho, oa mo bopella oa mo lohlella ka setšoantso sa Hao ka sebele, ke a U rapela, Morena, U tle u re nke bosiu bona. Sena e be sehopotso bosiung bona, seo re se hopolang ruri, ho re, bosiung bona, Morena, bosiung bona, hantle mona kahar'a Stardust Motel, U bopelle batho litšoantsong tsa bara ba Molimo. Aba sena, Morena. 'Metli e moholo, ke Uena u inotsi Ea ka e phethisang. Nka Lentsoe la Hao, Morena, Le bopelle hantle lipelōng tsa rōna bohole, re tle re be mesebetsi ea Hao e tsoileng-matsoho matsatsing a qetelo, le ho bitsoa Monyaluoaa oa Kreste. Batho ba bang ba tle ba bone bonneta bo tiileng le thabo e kakang e leng teng ho Mo phelela.

<sup>226</sup> Morena, letsatsing lena, esita le likereke tsa rōna, li ntse li timelloa ke botšepehi ba tsona. Ha li . . . Li bonahala, li ile tsohle Hollywood. Morena, ho etsahetse'ng? Li setse e—e phatsimo morao sebakeng sa khanya. Re tseba lefatše le phatsima ka selefatše. Empa Evangelie e khanya ka lerato le ka Kreste. Aba

sena, Morena, re tle re suthe phatsimong ea lefatše, le ho kena khanyeng ea Kreste.

<sup>227</sup> Ke ba Hao, Morena. U ba reklotse. Uena! Ba phahamisitse letsoho la bona, bosiung bona, ba batla ho ba joalo. Joale, Ntate, ke... Holane nka khona, nka ba etsa seo, empa ha ke khone. Empa ke itsepisitse ka Uena. U boletse, “Ea tlāng ho ’Na Nke ke ka mo lahlela ntle le ka mohla. Ea utloang Lentsoe la Ka ’me a lumela ho Ea Nthomileng, o na le Bophelo bo sa eeng kae, ’me a ke ke a tla Kahlolong,” ha se moipehi-tumelo joale, Morena, empa ea lumelang, “o tlōhile lefung ho kena Bophelong.” Aba sena, Ntate. Ke ba Hao, ka Lebitso la Jesu Kreste. Amen.

<sup>228</sup> Le a Mo rata na? [Phutheho e re, “Amen.”—Mohl.] Na ha A babatsehe? [“Amen.”]

<sup>229</sup> Re fe chunu e nyenyane, kapa k’hoto mono, khaitseli, *Setsoto*, *Setsoto*.

Na le rata ho bina? Na ke bua lolololo?

<sup>230</sup> Ke rata ho rorisa. Lōna ha le joalo? [Phutheho e re, “Amen.”—Mohl.] Nthoana, Molaetsa o khethulang ka tsela ena, ha ke... Le a tseba, ha ke batle ho khethula. Empa, lōna, u tlameha ho tiisa thakhisa, ho tšoara ka thata. Le tseba seo ke se bolelang? Yaa. Utlameha ho e thakhisa fatše joale. ’Me le a bona?

<sup>231</sup> Na le rata sefela seo? “Setsoto, setsoto, Jesu ho ’na.” Le tseba seo?

Ke setsoto, ke setsoto, Jesu ho ’na,  
Moeletsi, Khosana Khotso, Ke Molimo o Matla;  
Oa mpholosa, o ntlosa sebeng le masoabing,  
Molopolli ke setsoto, ho rorisoe Lebitso la Hae!  
  
Joale ke thotsoe, ke lokolotsoe tsuong,  
tahlehong,  
Jesu o aba tokoloho le poloko e tletseng;  
Oa mpholosa, o ntlosa sebeng le masoabing,  
Molopolli ke setsoto, ho rorisoe Lebitso la Hae!

E mong le e mong!

Ke setsoto, ke setsoto, Jesu ho ’na,  
Moeletsi, Khosana Khotso, Ke Molimo o Matla;  
Oa mpholosa, o ntlosa sebeng le masoabing,  
Molopolli ke setsoto, ho roriase Lebitso la Hae!

<sup>232</sup> Joale ha re reng, “Ho bokoe Morena!”[Phutheho e re, “Ho bokoe Morena!”—Mohl.] Ho bokoe Morena! Ha le ikutloe le hohliloe na? [“Amen.”] Le ikutloa le thabile? Rorisang Morena. O a babatseha.

<sup>233</sup> Molimo a le hlohonolofatse ke be ke kōpane hape. Ke tla fetisetsa tšebeletso joale ho moena, mopresidente.



*MOSEBETSI O TSOILENG-MATSOHO OA MOLIMO O A SUPTJOA SST64-1205*  
(The Identified Masterpiece Of God)

Molaetsa wona, ka Moena William Marrion Branham, o rerilwe sethatong ka Senyesemane, Moqebelo mantsiboea, Tšitoe 5, 1964, bank'hueteng ea Full Gospel Business Men's Fellowship International, Stardust Motel, Yuma, Arizona, U.S.A., o ntshitswe kgatisong ya teipi ya makenete mme o ngotswe o sa kgaolwa ka Senyesemane. Petolelo ena ya Sesotho sa Borwa e ngotswe mme e abjwa ke ba Voice Of God Recordings.

SOUTH SOTHO

©2020 VGR, ALL RIGHTS RESERVED

VOICE OF GOD RECORDINGS, SOUTH AFRICA OFFICE  
58 DISA ROAD, ADMIRAL'S PARK, GORDON'S BAY 7140 WESTERN CAPE  
REPUBLIC OF SOUTH AFRICA

VOICE OF GOD RECORDINGS  
P.O. Box 950, JEFFERSONVILLE, INDIANA 47131 U.S.A.  
[www.branham.org](http://www.branham.org)

## Temoso Ea Tokelo Ea Qopitso

Litokelo tsohle li babaletsoe. Buka ena e ka porintoa ka porintara ea lelapa molemong oa motho eo kapa ea abjoa, ntle ho tefiso, e le thepa e jalang Evangeli ea Jesu Kreste. Buka ena e ke ke ea rekisoa, ea boela ea hilahisoa ka bongata, ea manehoa leboteng la website, ea bolokoa ka tsela eo e ka boelang ea ntšoa, ea fetoleloa ka lipuo lisele, kapa ea sebelisoa ho qela matlole ntle le tumello e ngotsoeng ea Voice Of God Recordings®.

Ho fuoa boitsebiso bo bong kapa bakeng sa thepa e nngoe e ka fumanoang, ka kopo ikopanye le:

VOICE OF GOD RECORDINGS  
P.O. Box 950, JEFFERSONVILLE, INDIANA 47131 U.S.A.  
[www.branham.org](http://www.branham.org)